

# Маҳалла

ИЖТИМОЙ-СИЁСЙ,  
МАЪНАВИЙ-МАЪРИФЙ ГАЗЕТА

№5 (2091) | шанба, 4 февраль 2023 йил

www.xolisnazar.uz @xolis\_nazar @xolisnazar



## «ПРЕЗИДЕНТ ТАШРИФИ МАҲАЛЛА АҲЛИНИ РУҲЛАНТИРИБ ЮБОРДИ»

МАҲАЛЛАДА ҚУРИЛГАН АРЗОН УЙЛАРНИНГ 1 МЕТР КВАДРАТ БАҲОСИ  
ЖИҲОЗЛАРСИЗ — 2,2 МИЛЛИОН СЎМ, ЖИҲОЗЛАР БИЛАН — 2,8 МИЛЛИОН СЎМНИ  
ТАШКИЛ ЭТАДИ. БУ УЙЛАРНИНГ БИТТАСИНИ 10 КУН ИЧИДА ҚУРИШ МУМКИН.



2-  
саҳифада.

### Маҳаллалардан салоҳиятли кадрлар саралаб олинди

Кадрлар резервига олинган янги даврнинг янги раҳбарлари ўз салоҳиятини доимий тарзда ривожлантириб бориш тизимига кўра, шахсий ривожланиш режасини ишлаб чиқиши ҳамда уни амалиётга татбиқ этиши, лидерлик ва бошқарувга оид китоб ўқиши, шахс сифатида ўзини доимий ривожлантириб бориши лозим.

9

### Ҳоким ёрдамчиси ташаббускор бўлса, маҳаллада муаммо қолмайди

Маҳалладаги 917 та хўжаликда 5 минг 434 киши истиқомат қилади. Маҳалладаги ҳоким ёрдамчиси уларнинг электр энергияси таъминотидаги авария ҳолатларидан чекаётган азиятини ҳам «Очиқ бюджет» ахборот портали орқали ҳал этишга бел боғлади.

10

### 400 минг аҳолининг бандлиги таъминланди

Иссиқхоналар қуриш учун имтиёзли кредит, субсидиялар ажратилди. Биргина 2022 йилнинг ўзиде 133,3 мингдан ортиқ хонадонда ихчам иссиқхоналар қуриш белгиланган. Бу 2021 йилга нисбатан 43 мингтага кўп. Ҳозирга қадар белгиланган режа деярли бажарилиб, 124 мингдан ортиқ хонадон ўз иссиқхонасига эга бўлди.

13

### «Тозалик фаришталари»: Уларнинг дардини ким тинглайди?

Овқатланиш жойларига кириб, бир пиёла чой сўрасак, ҳатто нақд пулимизга беришмайди. Биздан ор қилишадими, чиқариб юборишади. Гоҳида шошилишч ҳашарга чақириб қолишганида жамоат транспортларига чиқамиз десак, пулини тўласак-да олиб кетишмайди.

15





## «Президент ташрифи маҳалла аҳлини руҳлантириб юборди»

**МАХАЛЛАДА ҚУРИЛГАН АРЗОН УЙЛАРНИНГ 1 МЕТР КВАДРАТ БАҲОСИ ЖИҲОЗЛАРСИЗ — 2,2 МИЛЛИОН СЎМ, ЖИҲОЗЛАР БИЛАН — 2,8 МИЛЛИОН СЎМНИ ТАШКИЛ ЭТАДИ. БУ УЙЛАРНИНГ БИТТАСИНИ 10 КУН ИЧИДА ҚУРИШ МУМКИН**

Маҳаллалардаги ободлик, гўзаллик, қулай шарт-шароит ўз-ўзидан бўлмайди. Бунинг учун, аввало, ташаббус ва маблағ зарур. Бугун Президент Шавкат Мирзиёев юртимиздаги ўзгариш ва ислохотларнинг ҳар бир маҳаллага кириб боришига, бунинг учун бюджетдан ажратиладиган маблағни маҳалла даражасида тақсимлашга эришди. Мутасаддиларни мана шундай вертикал ишлашга ўргатди. Натижаси бугун оиламизда, ҳовлимизда, кўчамизда, маҳалламизда сезиляпти.

Президентнинг маҳалламизга ташрифи чоғидаги фаоллар, нурунийлар, оддий одамлар билан мулоқоти асосини муносиб турмуш даражасига эришиш масаласи ташкил этди. Маҳаллада яратилган ноёб тизимнинг ўзига хос томонлари, аҳоли розилиги йўлида амалга оширилаётган лойиҳалар, иш ўринларини яратиш, бир сўз билан айтганда, энг кичикдек кўринган масаладан энг йиригигача муҳокама қилинди, ташаббуслар ўртага ташланди.

Шавкат Мирзиёев ҳозир маҳалла фаоллари катта бир команда экани, раиснинг ёнида ўринбосарлари, ҳоким ёрдамчиси, ёшлар етакчиси, хотин-қизлар фаоли, профилактика но-зири доимо ҳамжиҳат ишлаш вақти эканини таъкидлади. Бугун бунинг учун маҳалла ходимларининг ойлиги, шароити, ваколати билан бор. Энди шундай муносабатга жавобан масъулият ҳам бўлиши керак. Жамиятдаги ўзгаришларда маҳалла ташаббускор, халққа елкадош бўлиши лозим. Давлат раҳбари ёшлар тарбиясига алоҳида эътибор қаратиш зарурлиги, бунда, айниқса, нурунийлар, кўпни кўрган кексалар тажрибасига суяниш лозимлигини қайд этди.

**Айтиш керакки, маҳалламизда 3 минг 600 нафардан ортиқ аҳоли истиқомат қилади.** Ҳар бир хонадон ердан унумли фойдаланишнинг ҳадисини олган. Шу боис асосий «драйвер»имиз — иссиқхона ва деҳқончилик. Худуддаги қайси бир хонадонга кирманг, бир қарич ер бўш турганини кўрмайсиз. Ҳатто киш кунларида ҳам иссиқхоналарда иш қизгин. Иилнинг тўрт фаслида улар етиштирган сабзавотлар ички бозорни тўлдирмоқда.

Кейинги йилларда «Ҳар бир оила – тадбиркор» дастури асосида паррандачилик, узумчилик, иссиқхоналар ташкил

этилмоқда. Шунингдек, маҳалла ҳудудида тўқимачилик корхонаси, озиқ-овқат дўконлари ва устахоналар бор. Шу боис одамларнинг бандлиги маҳалланинг ўзида, аҳоли томорқасида, иссиқхонасида таъминланган. Бунда оилавий тадбиркорлик ривож топяпти. Айни вақтда 220 та хонадонда турли йўналишларда тадбиркорлик йўлга қўйилган.

Бугун юртимиз маҳаллаларида бўлаётган бунёдкорлик ишлари, ўзига хос янгиланишлар бизнинг маҳаллани ҳам четлаб ўтмаган. Жумладан, ўтган йили маҳалла фаоллари учун янги бино қуриб берилди. Қолаверса, 1,5 километр узунликдаги велосипед йўлаги, маҳаллага ажратилган маблағ ҳисобидан жами 21,5 минг квадрат метр ички йўллар ва пиёдалар йўлакларига асфальт ва цемент-бетон ётқизилди. Чек ва Янги турмуш кўчаларининг маҳалла ҳудудидан ўтган 2,5 километр қисми реконструкция қилинди. 1 та спорт майдончаси қурилиб, 1,5 километр суғориш тизими қурилди. Электр энергияси таъминотини яхшилаш мақсадида 336 та бетон таянч устун, 3 та трансформатор ўрнатилди. 13,5 километр тоза ичимлик сув ва 10,5 километр табиий газ тармоғи таъмирланди.

**Эҳтиёжманд оилаларни қўллаб-қувватлаш, уларнинг уй-жой шароитларини яхшилаш, бандлигини таъминлаш борасида олиб борилаётган ишлардан фуқаролар мамнун.** Хусусан, «Темир дафтар»га тадбир бошидан 52 та оила киритилган эди. Бугун уларнинг 50 таси рўйхатдан чиқарилиб, бандлиги таъминланди, озиқ-овқат ва моддий ёрдам кўрсатилди. Ҳозирда дафтарда иккита кам таъминланган оила қолмоқда. Худди шундай, «Аёллар дафтари»га 53 нафар аёл киритилган бўлиб, шундан бандлиги таъминланганлар 12 нафарни, тад-



биркорлик фаолияти учун кредит ажратилганлар 9 нафарни, моддий ёрдам кўрсатилганлар 32 нафарни ташкил этади. Барча рўйхатдагилар дафтардан чиқарилди. «Ёшлар дафтари»даги ёшлар сони 30 нафарни ташкил этиб, уларнинг 20 нафарига 10 сотихдан ер ажратилди, ҳарбий йўналишда ўқиш, ҳайдовчилик ўқув курси харажатини қоплаш, контракт-шартнома тўловини амалга ошириш учун маблағ йўналтирилди, қолаверса, бир марталик моддий ёрдам пули, моддий ва тиббий ёрдам кўрсатилди. Ҳозир дафтарда қолган

10 нафар ёш билан иш олиб борилмоқда.

Кейинги йилларда республикамизда аҳоли ўсиши ҳисобига электр истеъмоли ҳам кундан-кунга ошмоқда. «Садда таги»да бу муаммонинг ечими сифатида қайта тикланувчи электр энергия манбаларидан фойдаланишга ўтиляпти. Қуёш энергиясидан фойдаланаётган 50 та хонадонда ортиқча харажатнинг олди олинди. Аҳамиятлиси, сиз уйингизга қуёш панели ўрнатсангиз, эҳтиёжингиздан ортиб қолган электрни давлатга сотишингиз мумкин.

Шу боис Президентимиз «Андиджон тажрибаси» сифатида буни оммалаштириш таклифини билдирди.

**Маҳалламизда уй-жой масаласида ўзига хос тажриба йўлга қўйилди.** Давлатимиз раҳбари маҳаллада яшовчи Диёр Мамадалиев хонадонда меҳмон бўлиб, тажриба билан танишди.

Маълумки, Андижон вилоятида аҳоли зич жойлашган. Уй-жойга талаб катта. Жумладан, Мамадалиевлар уйида ҳам беш оила яшаётганди. Шу боис хонадон ҳовлисида тажриба тариқасида йиғма уйлар қурилди. Улар камхарж, иссиқ-совуқ ва ёнғинга чидамли, қуриш ҳам осон, шовқиндан юқори даражада ҳимоя қилинган. Мазкур уйлар Туркия технологияси асосида «Modern sunny home» МЧЖ томонидан бунёд этилган бўлиб, 1 метр квадрат уйнинг баҳоси жиҳозларсиз – 2,2 миллион сўм, жиҳозлар билан – 2,8 миллион сўмни ташкил этади. Бу уйларнинг биттасини 10 кун муддат ичида қуриш мумкин.

Президент мезбонларни янги уйлар билан муборакбод этиб: **«Уй инсоннинг энг асосий эҳтиёжларидан бири. Ҳам давлат, ҳам тадбиркорлар томонидан кўплаб турар жойлар қурилаётгани халқимиз манфаатини таъминляпти. Танлов имкониятини кенгайтириш учун эҳтиёжмандлар учун бундай арзон уйлар ҳам керак»,** — дея таъкидлади.

Умуман олганда, аҳоли бандлигини таъминлаш, ёшларнинг бўш вақтини самарали ўтказиш бўйича қилинаётган ишлар бизнинг маҳалла ҳаётида сезилмоқда. Буни маҳаллада ишсизлик камлиги, ўтган йили бирор-та жиноят бўлмаганидан кўриш мумкин. Президент халқимиз мана шундай обод, чиройли жойларда яшашга муносиблиги, ишларни «маҳаллабай» ташкил этаётганимиздан мақсад шу экани, энди бу ерда муҳит, қўни-қўшничилик, аҳиллик мустаҳкам бўлиши лозимлигини қайд этди.

**Сарвиноз ҚОДИРОВА,**  
Андижон туманидаги  
«Садда таги» маҳалла  
фуқаролар йиғини раиси.





## 2022 йилда 92 та янги маҳалла ташкил этилди

**МАҲАЛЛАЛАР КАМИДА 500 ТА ОИЛА ЯШАЙДИГАН АҲОЛИ ПУНКТЛАРИНИНГ ГЕОГРАФИК ЖОЙЛАШИШНИ ҲИСОБГА ОЛГАН ҲОЛДА ТАШКИЛ ЭТИЛАДИ. ИСТИСНО ҲОЛЛАРДА, 500 НАФАРДАН КАМ АҲОЛИ, ЛЕКИН КАМИДА 100 ТА ОИЛА ЯШАЙДИГАН БОРИШ ҚИЙИН БЎЛГАН ВА ТОҒЛИ ТУМАНЛАРДА ҲАМДА ҲАРБИЙ ШАҲАРЧАЛАРДА МАҲАЛЛАЛАР ТАШКИЛ ЭТИЛИШИ МУМКИН**

Маълумотларга кўра, 2023 йилнинг 1 январь ҳолатига мамлакатимизда 9 406 та фуқаролар йиғини мавжуд. Шундан 40 таси шаҳарча, 72 таси қишлоқ, 165 таси овул, 9 129 таси маҳалла фуқаролар йиғинларидир. Қолаверса, 2 та жамоатчилик асосида фаолият юритувчи йиғинлар бор. Бу — 2022 йил 1 январдаги кўрсаткичдан (9 314 та) 92 тага кўп демакдир. Бундан англашиладики, ўтган йили юртимизда 92 та маҳалла янгидан ташкил этилган. Хўш, бу маҳаллалар қандай асосга кўра тузилди? Умуман, маҳаллалар қандай тартибда ташкил этилади?

### МАҲАЛЛАЛАР ҚАНДАЙ ТУЗИЛАДИ?

Айтиш керакки, айтиш жараёни Вазирилар Маҳкамасининг 2014 йил 4 мартдаги тегишли қарори билан тасдиқланган «**Шаҳарлар, посёлкалар, қишлоқлар ва овулларнинг маҳаллаларини тузиш, бирлаштириш, бўлиш ва тугатиш, шунингдек уларнинг чегараларини белгилаш ва ўзгартириш, уларга ном бериш ва уларнинг номини ўзгартириш тартиби тўғрисида**»ги Низомга асосан амалга оширилади. Унга кўра, маҳаллалар шаҳарлар, посёлкалар, қишлоқлар ва овуллар ҳудудида ташкил этилади.

Маҳаллаларни тузиш, бирлаштириш, бўлиш ва тугатиш, шунингдек, уларнинг чегараларини белгилаш ва ўзгартириш, уларга ном бериш ва уларнинг номини ўзгартириш бўйича таклифлар фуқаролар йиғинлари кенгашлари томонидан тайёрланади. Маҳаллаларни бирлаштириш, бўлиш ва тугатиш фуқаролар йиғинлари илтимосномаси бўйича халқ депутатлари туман-шаҳар Кенгашлари томонидан, вилоятга бўйсунувчи шаҳарларда ва Тошкент шаҳрида халқ депутатлари шаҳар Кенгашлари томонидан амалга оширилади.

Маҳаллалар ҳудудларнинг тарихий хусусиятларини, қоидага кўра, **камида 500 та оила яшайдиган** аҳоли пунктларининг географик жойлашишини ҳисобга олган ҳолда ташкил этилади. Истисно ҳолларда, **500 нафардан кам аҳоли, лекин камида 100 та оила яшайдиган** бориш қийин бўлган ва тоғли туманларда ҳамда ҳарбий шаҳарчаларда маҳаллалар ташкил этилиши мумкин. Юқорида белгиланган тартибга мувофиқ, маҳаллалар тузиш мумкин бўлмаган тақдирда, посёлкалар, қишлоқлар ва овулларнинг ҳудудлари, маҳаллалар тузмасдан, тегишли фуқаролар йиғинлари томонидан бошқарилади.

### ҚАЙСИ ВИЛОЯТДА ЭНГ КЎП МАҲАЛЛА ТАШКИЛ ЭТИЛДИ?

Айтиш керакки, бугунги кунда мавжуд маҳаллаларнинг 100 дан зиёдида аҳоли сони 8 минг ва ундан ортиқни ташкил қилади. Шунингдек, хонадонлар сони 1 500 дан ортиқ бўлган 400 га яқин, оилалар сони 1 500 дан ортиқ бўлган мингдан зиёд маҳалла мавжуд. Бу эса ушбу маҳаллаларда ижтимоий-маънавий муҳит барқарорлигига, аҳоли муаммоларини ўз вақтида аниқлаш ва бартараф этишга салбий таъсир кўрсатади. Шу боис ушбу маҳаллаларни аҳолининг розилиги билан бўлиш мақсадга мувофиқ саналади.

Юқорида қайд этганимиздек, ўтган йили мамлакатимизда аҳоли муаммоларини «маҳаллабай» ўрганиш ва уларни жойида ҳал этиш мақсадида **92 та маҳалла** ташкил этилди. Бунда уларнинг айримлари мавжуд маҳаллаларни аҳоли сони ортиб кетгани ҳисобига бўлинди, янги мавзеларнинг фойдаланишга топширилиши муносабати билан янги маҳаллалар тузилди, аҳоли сони кам, ҳудуди бир-бирига яқин йиғинлар ўзаро бирлаштирилди.

Ҳудудлар кесимида оладиган бўлсак, энг кўп Қашқадарёда 23 та, Андижонда 22 та, Наманганда 11 та, Тошкент шаҳрида 9 та, Фарғонада 7 та, Хоразмда 5 та, Тошкент вилоятида 4 та, Жиззах, Сурхондарё, Самарқандда 3 тадан, Сирдарёда 2 та янги маҳалла ташкил этилди. Мисол учун, Қашқадарё вилояти Деҳқонobod туманидаги 5 та — «Гумбулок», «Дуоб», «Ингичка», «Ўзбекистон», «Оққишлоқ» маҳаллаларини бўлиш орқали мос равишда янги — «Дархон», «Ватанпарвар», «Зафаробод», «Янги Ўзбекистон», «Гулистон» йиғинлари ташкил этилди. Бунда аҳоли сонининг ортиб бораётгани, қишлоқларнинг тарқоқ жойлашгани, истисно тариқасида бориш қийин ва тоғли ҳудуд бўлгани ҳисобга олинди.

— **Маҳалламизда аҳоли сони 5 000 нафардан ошгани, қолаверса, айрим қишлоқлар узок масофада жойлашгани ҳисобига иккига бўлинди, — дейди «Дуоб» маҳалласи раиси Зокир Равшанов.** — Шу боис Дегмарон, Чуқурсой, Қамчибулок, Терсоқар қишлоқларини ўз ичига олган, аҳолиси сони 2 700 нафардан зиёд бўлган янги маҳалла — «Ватанпарвар» йиғини ташкил этилди. Айтиш керакки, йиғиннинг иккига бўлигани ишимиз самарадорлигини оширди, ҳар бир хонадон билан доимий мулоқот қилиш имконияти яратилди.

### ЖАРАЁН ҲАМОН ДАВОМ ЭТМОҚДА...

Янги маҳаллалар ташкил этиш жараёни ҳали тугагани йўқ. Қорақалпоғистон Республикасида мавжуд 25 та маҳалла негизда янги 28 та фуқаролар йиғини ташкил этилди. Мисол учун, Нукус шаҳрида 7 та, Тўрткўл туманида 12 та, Нукус туманида 4 та, Эллиққалъа туманида 3 та, Хўжайли туманида 2 та йиғин тузилди. Айни кунларда янги маҳаллаларга раислар сайлови ўтказилмоқда. Жумладан, Эллиққалъа туманидаги янгидан ташкил қилинган «Барҳаёт» маҳалла фуқаролар йиғинига янги раис сайланди.

— **Маҳалламиз аҳли менга ишонч билдириб, фуқаролар йиғини раиси лавозимига сайлашди, — дейди Темир Аллаберенов.** — Сайловолди дастуримда, энг аввало, иқтисодий ва ижтимоий муаммоларни ҳал этиш, оилалар фаровонлигига эришиш, ёшлар ва болалар таълим-тарбиясида нурунийлар тажрибасидан фойдаланиш, маҳалла ободлигига ҳисса қўлиши, тегишли ташкилотлар билан ҳамкорлик алоқаларини мустақкамлаш каби масалалар ўрин олган. Ўз фаолиятимда бу масалаларни ҳал этишга, одамларнинг ўз ҳаётидан рози яшашига ҳаракат қиламан. Зеро, бугунги ислохотларнинг бош мақсади ҳам аслида — шу.

Этибор берган бўлсангиз, юқорида республика бўйича иккита маҳалла **жамоатчилик асосида** фаолият юритиши ҳақида сўз юритдик. Айтиш керакки, Узун туманидаги «Пахлавон» ва «Дуғоб» маҳаллаларида оилалар сони 100 тага етмайди, энг яқин маҳалла билан оралиқ масофа 25-30 километрни ташкил этади. Қолаверса, мазкур йиғинлар бориш қийин бўлган тоғли ҳудудларда жойлашган, уларни бир-бирига қўшиб ҳам бўлмайди. Шу боис мазкур маҳаллаларга раис штати ажратилмаган, раҳбарлик жамоатчилик асосида олиб борилади.

Умуман олганда, ҳар йили аҳоли сонининг ошиши ҳисобига янги маҳаллалар ташкил этиб борилади. Бу оилалар билан ишлаш, ҳар бир хонадонни қамраб олиш, ижтимоий ёрдамларнинг ҳар бир уйга кириб боришини таъминлайди. Қолаверса, йиғинлар иш самарадорлигини ошириб, ихчам ва тартибли фаолият юртишига замин яратади.

Санжар ИСМАТОВ.



## ДАСТУРЛАР ДОИРАСИДАГИ КРЕДИТЛАРНИ АМАЛДАГИ ЙИЛЛИК 14 ФОИЗ СТАВКАДА АЖРАТИШ ТАРТИБИ САҚЛАБ ҚОЛИНАДИ. ТОМОРҚА ЕР ЭГАЛАРИГА БЕРИЛАДИГАН МИКРОКРЕДИТЛАР МИҚДОРИ 3 МИЛЛИОН СЎМГАЧА ОШИРИЛАДИ

# Маҳалладаги лойиҳага 300 миллион сўмгача кредит берилади



**Бугун маҳалланинг жамият ҳаётидаги ўрни ва аҳамияти, ваколати оширилгани баробарида барча муаммолар маҳалланинг ўзида ечим топишига эътибор қаратилмоқда. Хусусан, «Маҳалла бюджети» тизими жорий этиляпти, маҳаллаларда турли йўналишлар бўйича тадбиркорликка ихтисослашган микромарказлар фаолияти йўлга қўйилмоқда, ер ва мол-мулк солиқлари бўйича маблағлар маҳалланинг ўзида қолиши таъминланмоқда.**

Юқоридагиларга қўшимча равишда оилавий тадбиркорликни ривожлантириш дастурлари доирасида маҳаллада ўз бизнесини бошламоқчи бўлган фуқароларга имтиёзли кредитлар тақдим этиляпти. Айтиш керакки, бу жараёнда одамларнинг кредит оламан, деб ҳоқимиятга, банкка ёки бошқа идорага бориб юриши, асбоб-ускуналарни сотиб олиш учун таъминотчини қаердан топаман, деб бош қотиришига зарурат қолмаган. Кредитни расмийлаштиришдан тортиб, махсулотни олиш-сотишигача бўлган барча жараёнлар, электрон тарзда, онлайн ҳал этилмоқда.

Куни кеча, аниқроғи, 2023 йил 31 январдаги «Оилавий тадбиркорликни ривожлантириш дастурлари доирасида аҳолининг бизнес ташаббусларини қўллаб-қувватлашни янги босқичга олиб чиқишга доир қўшимча чора-тадбирлар тўғрисида»ги Президент қарори билан айна йўналишдаги янги мақсадлар белгилаб олинди. Хўш, улар нималардан иборат? Қарор нимаси билан аҳамиятли? Унинг маҳаллалардаги оддий одамларга қандай фойдали жиҳатлари бор?

### 50 миллион сўмгача гаровсиз кредит берилади

Маълумот учун айтиш керакки, оилавий тадбиркорликни ривожлантириш дастурлари доирасида имтиёзли кредитлар йиллик 14 фоиз ставкада 3 ойдан 6 ойгача бўлган имтиёзли давр билан 3 йилгача муддатга ажратилади. Бунда кредитлар оилавий тадбиркорлик, даромад топишга қаратилган муайян меҳнат фаолияти билан шуғулланиш ва фаолият турини кенгайтириш истагини билдирган аҳоли ҳамда тадбиркорлик субъектларига тақдим этилади.

Ҳоким ёрдамчисининг тавсияномаси билан тадбиркорлик ташаббусига эга жисмоний шахсларга 33 миллион сўмгача ҳамда белгиланган тартибда давлат рўйхатидан ўтган кичик тадбиркорлик субъектларига учинчи шахс кафиллиги, суғурта полислари, кредит ҳисобига сотиб олинаётган мол-мулклар гарови ва бошқа таъминот турлари асосида 225 миллион сўмгача бўлган миқдорда кредит берилади.

Юқоридаги қарорга асосан, 2023 йилда оилавий тадбиркорликни ривожлантириш дастурлари доирасидаги лойиҳаларни молиялаштириш учун камида **13 триллион сўм** йўналтирилади

(ўтган йил шу мақсадлар учун 10 триллион сўм йўналтирилган). Бунда 6 триллион 900 миллиард сўм аввал берилган кредитларнинг сўндирилиши, 3 триллион 381 миллиард сўм Тикланиш ва тараққиёт жамғармаси, 2 триллион 719 миллиард сўм ваколатли банкларнинг ўз ресурслари ҳисобидан ажратилади.

**2023 йил 1 февралдан** бошлаб, кредитлар устувор равишда дастурлар бўйича **аввал кредитлардан фойдаланмаган аҳоли ва тадбиркорларга** ажратилади. Узоқ муддатга қишлоқ хўжалигига мўлжалланган ер майдонларини ижарага олиб, белгиланган тартибда рўйхатдан ўтган деҳқон хўжаликлари ва кичик тадбиркорлик субъектларига **50 миллион сўмгача гаровсиз** кредит берилади.

Тадбиркорларнинг **маҳаллаларда** (шу жумладан, ташкил этилган микромарказларда) ишлаб чиқариш, хизмат кўрсатиш соҳаси ва хунармандчиликни ҳамда аҳоли билан **кооперация ва касаначиликни кенгайтиришга** йўналтирилган лойиҳалари учун **ҳоким ёрдамчиларининг тавсияномаси асосида** ажратилмаган кредитлар миқдори амалдаги 225

миллион сўмдан **300 миллион сўмгача** оширилади. Бунда ташаббускор лойиҳада камида 30 фоиз улуш билан иштирок этиши лозим.

Яна бир муҳим жиҳат — эндиликда дастурлар доирасида илгари олган кредитларидан самарали фойдаланиб, **тадбиркорлигини йўлга қўйган ва кредит тўловларини ўз вақтида амалга оширган** кичик тадбиркорлик субъектларига фаолиятини янада кенгайтириши учун **мазкур кредитлардан такроран фойдаланишга** рухсат этилади. Ўз навбатида кредитни ўз вақтида қайтармаган фуқаро ва тадбиркорлик субъектларига дастурлар доирасида янги кредитлар берилишига йўл қўйилмайди.

Имтиёзли кредитлардан фойдаланиб, даромад топишга қаратилган фаолият билан шуғулланаётган фуқаролар **ўзини ўзи банд қилган шахс** сифатида таснифланади. Ҳоким ёрдамчисининг тавсиясига кўра, кредит суммасининг **10 миллион сўмгача** бўлган қисми (хунармандлар учун **20 миллион сўмгача**) банк карталарига (нақдлаштириш имкониятини чеклаган ҳолда) ўтказиб берилади.

### Қайси ҳудудга энг кўп маблағ ажратилди?

Қарордаги муҳим жиҳатлардан яна бири, бу — дастурлар доирасидаги кредитларни амалдаги йиллик **14 фоиз ставкада** ажратиш тартиби сақлаб қолинади. Томорқа ер эгаларига берилмаган микрокредитлар миқдори **3 миллион сўмгача** оширилади ҳамда кредитлар оилавий тадбиркорликни ривожлантириш дастурларининг ягона электрон платформаси орқали ажратилади.

**2023 йил 1 июндан** аҳоли ва тадбиркорларга кредит ажратиш жараёнида қарз олувчини ID-картадаги (биометрик паспортдаги) биометрик маълумотлар асосида идентификация қилиш йўлга қўйилади.

Қарор билан белгиландики, Қорақалпоғистон Республикаси Вазирлар Кенгаши Раиси, вилоятлар ва Тошкент шаҳар ҳокими тижорат банклари билан биргаликда ажратилган кредитларнинг белгиланган муддатларда қайтарилишига **масъул** саналади. Ҳудудларда ҳар ойлик кредитлаш ҳажмлари кредитларни сўндириш графигининг **бажарилмаган қисмига мос равишда** камайтирилади. Дастурлар ижроси бўйича ҳар чорак яку-

нида **маҳаллий Кенгашларга ҳисобот бериш амалиёти** жорий этилади.

Ҳокимликларга дастурлар доирасида ҳудудларга ажратилган маблағларнинг йиллик ва ойлик лимитларини туман (шаҳар) ва маҳалла (овул) кесимида тақсимлаш, лойиҳаларнинг истиқболи ва қўшимча иш ўринлари яратишга йўналтирилганидан келиб чиқиб, **маҳаллалар лимитини ҳар ойнинг ўнинчи санасига қадар қайта кўриб чиқиш** ваколати берилди. 2023 йил 1 июлга қадар дастурлар доирасидаги кредитлар ҳажмини камида яна **2 триллион сўм**га ошириш чоралари кўрилади.

Айтиш керакки, қарор иловасига кўра, жорий йилда оилавий тадбиркорликни ривожлантириш дастурлари доирасида энг кўп Бухоро вилоятига — **1 триллион 150 миллиард сўм**, Андижон, Қашқадарё, Самарқанд, Фарғона вилоятларига — **1 триллион 100 миллиард сўм**, Сурхондарё вилоятига — **1 триллион 91 миллиард сўм**, Тошкент вилоятига — **1 триллион 60 миллиард сўм** маблағ ажратилади. Энг кам Тошкент шаҳрига — **290 миллиард сўм** йўналтирилади.



**Умуман олганда, юқоридаги қарор билан маҳаллаларда тадбиркорликни ривожлантириш, шу орқали оилалар фаровонлигини таъминлаш, янги иш ўринларини яратиш борасидаги ташаббуслар давом эттирилади. Энг муҳими, бу орқали кўплаб инсонлар маҳалласидан чиқмаган ҳолда ишли бўлади, оилавий бизнесини йўлга қўйиб, рўзғорини бутлайди. Оилада хотиржамлик, маҳаллада ҳамжиҳатлик, юрда тўқинлик бўлса, ҳар бир хонадон дастурхонига барака киради.**

Санжар ИСМАТОВ.









**«МАДАНИЯТ» МАҲАЛЛАСИ БУГУНГИ КУНДА ОБОД ВА КЎРКАМ  
МАСКАНГА АЙЛАНИБ БОРМОҚДА. ЭНГ МУҲИМИ, ОДАМЛАРНИНГ  
ЭРТАНГИ КУНГА ИШОНЧИ ЮКСАЛИБ, ЯШАШГА, КЕЛАЖАККА  
ИНТИЛИШИ КУЧАЙМОҚДА**

## 100 нафардан зиёд ёшлар иш билан таъминланди

**«Обод қишлоқ», «Обод маҳалла» дастурларига кўра, қишлоқ ва маҳаллаларимиз кўркам қиёфага кирди. Ғаллаорол туманидаги «Маданият» маҳалласи бу ўзгаришлардан четда қолгани йўқ. Худудда ишсизлик билан боғлиқ муаммоларга ечим топиш устивор вазифа сифатида белгиланган.**

Бу жараёнда, биринчи навбатда, ижтимоий ҳимояга муҳтож, энг оғир шароитда яшаётган ногиронлиги бор шахслар, кам таъминланган, боқувчисини йўқотган оилалар, ишсиз инсонларнинг муаммосини ҳал қилишга катта эътибор берилляпти.

— 2022 йил сарҳисобига кўра, маҳалламизда рўйхатга олинган ишсизларнинг 96 нафари доимий ишга жойлашган бўлса, 22 нафарининг ҳақ тўланадиган жамоат ишларида бандлиги таъминланди, — дейди маҳалла раиси **Латифжон Бутунбоев**. — 34 нафарига ижара асосида ер ажратилиб, 446 нафар фуқаро ўзини ўзи банд қилди. Маҳалламизда 100 дан ортиқ янги иш ўринлари яратдик. Хатлов натижаларида рўйхатга олинган 137 нафар хотин-қиз «Аёллар дафтари»га, 67 нафар фуқаро «Ёшлар дафтари»га киритилди. 24 нафар фуқаро қайта тайёрлов курсларида ўқитилди.

Ҳоким ёрдамчиси тавсияси асосида «Ҳар бир оила — тадбиркор», «Ёшлар — келажагимиз» ва бошқа дастурлар доирасида тадбиркорлик фаолияти билан шуғулланиш учун талабгорларга арзон кредит маблағлари ажратилди. Бу маблағлар ҳисобига сартарошхона, новвойхона, ҳунармандчилик, тикув, қандалатчилик цехлари ташкил этилди. Шунингдек, маҳалланинг ички имкониятлари ўрганилиб, «ўсиш нуқтаси» аниқланиб, асосий эътибор томорқачиликка қаратилган. Айни шу ҳаракатлар натижасида катта йўл ёқасидаги намунали уйлар олдига ҳосилдор узумлар экилди. Энди бу тоқзорлар сархил ҳосил бериш баробарида маҳалла йўллари кўрқига кўрк қўшмоқда.

— Оилавий тадбиркорликни ривожлантириш бўйича кредитга талабгор 130 та хонадонга кўмак кўрсатдик, — дейди **ҳоким ёрдамчиси Дилмурод Абдиев**. — 138 нафар жисмоний шахсга «Ҳар бир оила — тадбиркор» дастури доирасида иссиқхона қуриш, мототранспорт, миникультиватор воситалари, қуёнчилик, балиқчилик, гўзаллик салони, пойабзал таъмирлаш, тикув машиналари, тикувчилик асбоб-ускуналари олиш ва бошқа хизмат кўрсатиш соҳалари учун имтиёзли

кредит ажратилди. 2022 йилда 32 та янги корхона ташкил этилиб, 6 та корхонанинг фаолияти қайта тикланди. Чорвачилик, паррандачилик, қуёнчилик ва иссиқхона йўналишидаги янги тадбиркорлик субъектлари иш бошлади. Паррандачилик соҳасини ривожлантириш мақсадида хонадонларга 3 200 та товۇқ жўжалари етказиб берилди. Бунинг 1 480 таси текинга тарқатилди.

Маҳаллада турли тоифадаги эҳтиёжмандларга доимий ёрдам берилляпти. Масалан, «Темир дафтар»да турувчи оилаларга туман ҳокимлиги томонидан қуёш сув иситиш мосламалари бепул ўрнатиб берилди. Умуман, 2022 йилда жами 41 та эҳтиёжманд оила ҳолидан хабар олиниб, уларга моддий ва маънавий кўмак кўрсатилди.

Уз навбатида маҳалла инфратузилмасини яхшилашга катта эътибор берилляпти. Натижада маҳалла кўчалари обод, йўллар раvon бўлиб бормоқда.

— Йўлларнинг носозлиги, ичимлик сув етишмовчилиги каби масалалар йиллар давомида ечилмай келарди, — дейди **Л.Бутунбоев**. — Қувонарлиси, 2022 йил давомида Маданият, Тутли қишлоғининг 3 км., Нуробод қишлоғининг 1,8 км. қисми асфальтланди. 2-Қангли қишлоғида 2,2 км. лик бетон қопламали пиёдалар йўлакчаси барпо этилиб, тунги ёритиш чироклари ўрнатилди. Маданият қишлоғи аҳолисига тиббий хизмат кўрсатиш сифатини ошириш мақсадида қишлоқ врачлик пункти фойдаланишга топширилди. Бунинг натижасида одамларнинг узоғи яқин бўлди. Анча йиллардан бери яна бир муаммо қийнаб келарди. Яъни сел йўли тозаланмагани ва кўприк эскилиги учун қатнов хавфли бўлиб қолганди. Сектор раҳбари ташаббуси билан сел йўли тозаланиб, янги кўприк фойдаланишга топширилди.

«Маданият» маҳалласи бугунги кунда обод ва кўркам масканга айланиб бормоқда. Энг муҳими, одамларнинг эртанги кунга ишончи юксалиб, яшашга, келажакка интилиши кучаймоқда.

**Хайрулло АБДУРАҲМОНОВ.**

МАҲАЛЛАДАНИМАГАН?

### Ичимлик сув ва электр таъминоти тикланади



**Ч**ортоқ туманидаги 4 минг нафардан ортиқ аҳоли истиқомат қилувчи «Юксалиш» маҳалласида қарийб 35-40 йилдан буён тоза ичимлик сув муаммо эди. Бу ерда яшовчилар ичимлик сувни, асосан, ташиб олиб келарди.

Ниҳоят, шу кунларда худуд аҳолисига ичимлик сув тармоқ орқали етказиб бериладиган бўлди. Бу мақсадлар учун вилоят маҳаллий бюджети ҳисобидан 17 км. масофага янги тармоқ тортилиб, 2 та сув иншооти барпо

этилди. Ҳозирда ишлар якуний босқичда.

Худди шундай, «Нурафшон» маҳалласининг Мафтун кўчасида электр таъминоти узлуксизлигини таъминлаш, мавжуд трансформатор юкни енгиллатиш мақсадида 10 кВ. қувватга эга янги тармоқ тортиш ишлари олиб борилляпти. 19 та бетон таянч устунлари ҳамда 1 та қуввати 160 кВА. бўлган янги трансформатор ўрнатилиши натижасида бу худуд аҳолиси муаммодан халос бўлади.

**Х.АБДУРАҲМОНОВ.**



# Намунали фаолиятнинг асоси — ҳамжиҳатликда

ХУДУД КЎП ҚАВАТЛИ УЙЛАРДАН ИБОРАТ БЎЛГАНИ БОИС БУ ЕРДА ИССИҚХОНА ЁКИ ТОМОРҚА ОРҚАЛИ ТАДБИРКОРЛИК ҚИЛИБ БЎЛМАЙДИ. ДЕМАК, ОДАМЛАРНИНГ ЎЗИНИ ЎЗИ БАНД ҚИЛИШИ УЧУН БОШҚА ЧОРА ТОПИШ ДАРКОР. МАҲАЛЛА РАИСИ БУНИНГ ЙЎЛИНИ ТОПДИ...

Пойтахтимизнинг Юнусобод туманидаги «Шоштепа» маҳалласи фақат кўп қаватли уйлардан иборат. 12 та беш қаватли, 4 та тўққиз қаватли уйларда жами 5 500 нафардан зиёд киши истиқомат қилади. Ўзбек, қозоқ, қирғиз, уйғур, озарбайжон, тожик, афғон, рус, татар, украин, корейс каби миллат вакиллари бир оила аъзоларидек ҳамжиҳат ҳаёт кечирмоқда. Уларнинг мақсадлари бир, ниятлари ўхшаш. Барчаси шу юрт, шу маҳалла ободлиги, тинчлиги учун ўзини масъул ҳисоблайди.


Маҳалла муҳити кўп жиҳатдан одамларга бош-қош бўлаётган маҳалла раиси ва фаолларининг фаолиятига боғлиқ. 2016 йилда маҳаллага аввал қурилиш соҳасида фаолият кўрсатиб келган Алишер Юнусов раис этиб сайланди. Дастлаб ишни нимадан бошлашни, айна қайси жиҳатга эътибор қаратишни билмай боши қотган раисга маҳалла фаоллари кўмакка келди. Аввал маҳалланинг молиявий аҳволини ўнглашга келишилди. Ҳомийлар жалб этилди. Шу тариқа ҳар бир муаммо бирма-бир ўз ечимини топиб бормоқда. Аҳоли раиснинг ишидан мамнун, шунинг учун 2019 йилги сайловда уни бегона қилишмади, қайта сайлашди. Ўтган йилги сайловда яна бир бор ишонч билдиришди.

Худуд кўп қаватли уйлардан иборат бўлгани боис бу ерда иссиқхона ёки томорқа орқали тадбиркорлик қилиб бўлмайди. Демак, одамларнинг ўзини ўзи банд қилиши учун бошқа чора топиш даркор. Маҳалла раиси бунинг йўлини топди.

— Бугунги замон кечаги эмас, одамлар ҳаракат қиляпти, — дейди «Шоштепа» маҳалласи раиси Алишер Юнусов. — Бир жойдан даромад топаётган оила яна қўшимча даромад топишга интиляпти. Ҳаракатда барака борлигини тушуниб қолдик. Ҳар биримиз тадбиркор бўлишга, жамиятда ўрнимизни топишга, бир-биримизга кўмак қўлини чўзишга ҳаракат қиляпмиз. Давлатимиз раҳ-



МАҲАЛЛА САМАРАЛ БОШҚАРУ ТИЗИМИ



БИЛАСИМИ?

## Ногиронлиги бор ёшларга субсидия ажратиладими?

**Н**огиронлиги бўлган шахсларни ишга қабул қилган иш берувчиларга ҳар бир ходим учун 6 ойда БҲМнинг 1,5 бараварида (450 минг сўм) субсидия берилади.

Шунингдек, ҳар йили 500 нафаргача ногирон ёшларга қуйидагилар учун субсидия ажратилади:

☑ нодавлат таълим ташкилотларида касб-хунарга ўргатиш, уларда касбий кўникмаларни шакллантириш, ахборот технологиялари, ком-

пьютерда дастурлаш амалиёти, умумтаълим фанлари ва хорижий тилларни ўргатиш;

☑ тадбиркор ёки ўзини ўзи банд қилган шахс сифатида давлат рўйхатидан ўтганларга асбоб-ускуна ва меҳнат қуролларини харид қилиш учун.

Субсидиялар мазкур йўналишлардан биттаси учун ҳар бир ногиронлиги бўлган ёшнинг талабига мувофиқ, БҲМнинг 50 бараваригача миқдорда ажратилади.

БИЛИБ ҚЎЙГАН ЯХШИ!

## Энг кам пенсия миқдори қанча?

Ҳозирги кунда Ўзбекистон ҳудудида:

- ☑ меҳнатга ҳақ тўлашнинг энг кам миқдори – 920 000 сўм;
- ☑ базавий ҳисоблаш миқдори – 300 000 сўм;
- ☑ пенсияни ҳисоблашнинг базавий миқдори – 324 000 сўм;
- ☑ ёшга доир энг кам пенсиялар – 633 000 сўм;
- ☑ болаликдан ногиронлиги бўлган шахсларга бериладиган нафақа – 698 000 сўм;
- ☑ зарур иш стажига эга бўлмаган кекса ёшдаги ва меҳнатга лаёқатсиз фуқароларга бериладиган нафақа – 500 000 сўм;
- ☑ иш стажи тўлиқ бўлмаган чоғдаги пенсияларнинг энг кам миқдори қўшимча тўловни ҳисобга олган ҳолда – 500 000 сўм;
- ☑ белгиланган ёшга доир энг кам пенсия миқдоридан 698 000 сўмгача пенсия олувчиларнинг ёшга доир ва ногиронлик бўйича пенсиялари миқдори – 698 000 сўмдан иборат.

бари «Янгибоғ» маҳалласида туманимиздаги маҳаллалар фаоллари билан учрашганида маҳаллалар иқтисоди ўзгариши кераклигини таъкидлаганди. Шунда кўп қаватли уйлардан иборат маҳаллалар қандай йўл тутар эканми, деб ўйладик. Маҳаллага тадбиркорлик субъектларини жалб этиш орқали масалага ечим топдик.

Қибрай туманида тадбиркорлик билан шуғулланаётган Фарход Ҳасанов — маҳалладошимиз. Биз Фарходжонни ҳамкорликка чақирдик. Тадбиркор укамиз бу ерда қандолат маҳсулотлари ишлаб чиқаришни йўлга қўйди. Айни пайтда цеҳда турли печенье маҳсулотлари тайёрланиб, халқимиз дастурхонига тортиқ этилаётир. Энг муҳими, 20 нафарга яқин киши, хусусан, ёшлар иш билан таъминланди. Улар орасида «Аёллар дафтари» ва «Ёшлар дафтари»га киритилганлар ҳам бор. Олдимизга қўйган мақсадларимиз бисёр, режаларимиз қатта. Ишимизни кенгайтириш орқали ҳам ўзимизга, ҳам аҳолига фойда келтирмоқчимиз.

2018 йилда маҳалла раиси ташаббуси билан ташландиқ бино — эски дўкон ўрнида ўқув маркази қад ростлади. Қўшимча хоналарга эҳтиёж сезилгани боис кенгайтирилди. Новвойхона, стоматология хонаси, сартарошхона, қассобхона, сут-қатик маҳсулотлари ва хўжалик моллари сотиладиган дўконлар қаторида ўқув марказининг очилиши маҳалла аҳлини, жумладан, ёшларни қувонтирди. Марказда айни пайтда ўзбек тили ва адабиёти, рус, инглиз, араб, хитой, корейс тиллари, бухгалтерия сабоқлари, ментал арифметика, болалар учун мактабга тайёрлов, шахмат ва шашка, тасвирий санъат, мусиқа ва рақс каби курслар фаолият юритяпти. Маҳалладаги кам таъминланган оилалар фарзандлари маҳалла тавсияси билан текин таълим олади.

Маҳалла раисининг айтишича, «Аёллар дафтари» мамлакатимиздаги ижтимоий, иқтисодий, психологик қўллаб-қувватлашга, билим ва касб ўрганишга эҳтиёжи ва иштиёқи бўлган, ишсиз хотин-қизларнинг муаммоларини аниқлаш, уларни бартараф этиш ҳамда назорат олиб боришда қўлай ва янги тизим бўлди. Буни мазкур маҳаллада яшовчи Шахло Қудратиллаева ўз ҳаёти мисолида кўрди.

Икки йил муқаддам турмуш ўртоғи вафот этгач, оиладаги тўрт ўғил ёлғиз онанинг гарданида қолди. Уларнинг қорнини тўқлаш, устини бутлаш, таълим-тарбиясини назорат қилиш бирор жойда ишламайдиган Шахло опага, табиийки, оғирлик қилди. Шундоқ

ҳам кунлари амал-тақал ўтаётган оила учун оғир кунлар бошланди. Боз устига, олий ўқув юртига имтиҳон топширган тўнғич ўғил — Жавлон контрактга тушиб қолди. Онаси фарзандининг университетда ўқиши, келажаги учун қарз-ҳавола кўтарди. Йиққани — етмади. Бироқ маҳалланинг «кўзи» бор. Дарҳол кўмакка келишди. Шахло Қудратиллаева «Аёллар дафтари»га киритилди. Тез кунда 100 миллион сўмлик ҳомийлик ёрдами кўрсатилиб, уй мукамал таъмирланди. Мебель ва жиҳозлар келтирилди. Хонадон кўркам қиёфага кирди. Жавлоннинг бир йиллик контракт пули ҳам тўланди.

— Тошкент давлат транспорт университети-га контракт асосида ўқишга кирдим, — дейди Жавлон Баҳодиров. — Уқимоқчи эмасдим, рўзгорни тебратиш онамга оғирлик қилишини биламан, мустақил ишлаб, кўмак бермоқчи эдим. Бироқ маҳалла ёрдами билан бир йиллик контракт тўлаб берилгач, ўқишни бошладим. Бу йил эса ёзи билан ишлаб, контрактим учун маблағ йиғмоқчиман. Вақти келиб, бизга давлатимиз ва маҳалламизнинг кўрсатаётган ёрдами оқлаймиз — жамият қорига ярайдиган кадр бўлиб етишишга ҳаракат қиламиз.

Маҳалла ҳудуди обод бўлса, аҳоли кайфияти ҳам шунга монанд бўлади. Тоза ва обод жойда яшаш, ишлаб одамлар кайфиятини кўтаради. Уларнинг ҳаётида ўзгаришлар ясайди. «Шоштепа» маҳалласи бу борада бошқаларга ўрнал бўларли. Анча йиллар эгасиз қолган маҳалла идораси янги бинога эга бўлди. Замонавий, қўлай шароитларга эга бино маҳалла аҳолиси учун кечаю кундуз хизматга шай. Мономарказ, саломатлик йўлаги қурилди, ҳудуддаги 555-мактабгача таълим ташкилоти мукамал таъмирланди.

Халқ дардини ўзиники деб билганлар, бегона санамаганлар эл меҳрини қозонади, оғизга тушади, олқис олади. Алишер Юнусов мазкур ҳудудда кўп қаватли уйлар қурилиб, фойдаланишга топширилганда илк кўчиб келганлардан. Шу боисми, маҳаллага, одамларга меҳри бўлак. Маҳаллада туғилган илк фарзанд унинг қизи экан.

Маҳалла барпо бўлгандан буён барчага таниш Алишер акага одамларнинг ҳурмати баланд. Ҳар бир ишда раисга камарбаста. Катталар маслаҳати билан, ёшлар меҳнати, ташаббуси билан унинг ёнида. Маҳаллага «намунали» сифатининг берилиши ана шу ҳамжиҳатлик туфайли.

Жавлон ВАФОЕВ.



ОДАМЛАРНИНГ КЎЗИДАГИ ҚУВОНЧДАН ШУНИ БИЛИШ МУМКИНКИ, БУГУН УЛАР МАҲАЛЛА РАИСИ ФАОЛИЯТИДАН МАМНУН. МАҲАЛЛАДАГИ ЎЗГАРИШЛАР НАФАҚАТ МАҲАЛЛАГА, БАЛКИ ОДАМЛАР ҲАЁТИГА ЎЗГАЧА ФАЙЗ ОЛИБ КЕЛДИ

## «Биносиз ишлаган кунларимиз ортда қолди...»

Давлатимиз раҳбарининг 2022 йил 25 октябрда қабул қилинган «2022-2023 йилларда маҳаллалар инфратузилмасини янада яхшилаш бўйича қўшимча чора-тадбирлар тўғрисида»ги қарори ижросини таъминлашда Бекобод туманидаги «Истиқбол» маҳалла фуқаролар йиғини бир қатор ижобий натижаларга эришмоқда. Эътиборлиси шундаки, бу йўналишда ҳудудда маҳалла маркази қурилиб, моддий-техник таъминотни мустаҳкамлашга катта эътибор қаратиляпти.

Фуқаролар йиғинида кўп йиллардан буён маҳалла марказига эҳтиёж бор эди. Шу боис маҳалла раиси ва ходимлари ҳали у бинода, ҳали бу бинода ижарама-ижара юришга мажбур бўлган. Аҳоли вакиллари йиғин ходимларининг қўнимсизлигидан азият чеккани бор гап. Уйига боришса, топа олишмасди, вақтинчалик маҳалла биносига боришса, бошқа бинога кўчган бўлишарди. Хуллас, ҳар икки томон маҳалла биносининг йўқлигидан қийналди.

Энди бўлса, маҳаллада истиқомат қиладиган одамларнинг ва йиғин ходимларининг сарсон-саргардон бўлишларига ўрин қолмади. Чунки маҳалла раиси ташаббуси билан ҳомийлар кўмагида ҳашар уюштирилиб, маҳалла маркази қурилди. Бундан барча бирдек бахтиёр, маҳалла ходимлари ўз биносига аҳолига хизмат кўрсатаётганидан мамнун.

— Аввал мактаб биносининг таъмирланмаган эски хонасида, кейин маҳалладаги дўконларнинг

кичикроқ хоналарида, ҳатто одамларнинг эски уйларида ишлаганмиз, — дейди «Истиқбол» маҳалла фуқаролар йиғини раиси Абдуғани Бозорбоев. — Маҳалла аҳли томонидан ҳашар йўли билан янги қурилган бинода барча шароитлар мавжуд. Ҳар бир ходимга алоҳида хоналар ажратилган. Биносиз ишлаган кунларимиз ортда қолди. Мана шундай шароитларни кўриб, халқ манфаати учун шижоат билан ишлагиси келади одамнинг.

Айтиш керакки, маҳалла раисининг бу каби ташаббуси бошқаларни ҳам руҳлантормоқда. Жумладан, ҳомийлар жалб қилиниб, Сирдарё кўчасида истиқомат қилувчи Имгулсин Жўраевага 4 хонали уй жиҳозлари билан қуриб берилди. Янги Ўзбекистон кўчасида яшовчи Наргиза Назаровага маҳалла кўмаги билан 15 миллион сўм имтиёзли кредит эвазига ўз уйида тадбиркорлик билан шуғулланиши учун 5 бош қўй олиб берилди. Бу билан оиланинг моддий жиҳатдан ўсишига кўмаклашилди.



“

СИРДАРЁ КЎЧАСИДА ИСТИҚОМАТ ҚИЛУВЧИ ИМГУЛСИН ЖЎРАЕВАГА 4 ХОНАЛИ УЙ ЖИҲОЗЛАРИ БИЛАН ҚУРИБ БЕРИЛДИ. ЯНГИ ЎЗБЕКИСТОН КЎЧАСИДА ЯШОВЧИ НАРГИЗА НАЗАРОВАГА МАҲАЛЛА КЎМАГИ БИЛАН 15 МИЛЛИОН СЎМ ИМТИЁЗЛИ КРЕДИТ ЭВАЗИГА ЎЗ УЙИДА ТАДБИРКОРЛИК БИЛАН ШУҒУЛЛАНИШИ УЧУН 5 БОШ ҚЎЙ ОЛИБ БЕРИЛДИ.

”

— Уйимиз эски томидан чакки ўтиб ётарди, эшикни амаллаб ёпсак, деразадан шамол келарди, — дейди Сирдарё кўчасида истиқомат қилувчи Имгулсин Жўраева. — Турмуш ўртоғим билан ажрашганмиз. Иккита фарзандим ногирон. Уларни даволатганим боис рўзғордан орттириб уй қуриш у ёқда турсин, таъмирлашга имконим йўқ эди. Маҳалламиз раиси ташаббуси билан янги уй қуриб берилди. Эътибордан четда қолмаганимиздан хурсандимиз.

Бундан ташқари, маҳалла раиси ташаббуси билан Боғишамол, Ёшлик кўчаларининг 800 метрига тош ётқизиблиб, авваллари носоз аҳволда бўлган йўллар равон бўлди. Қолаверса, ушбу кўчаларнинг симёғочлари эскириб, қулайдиган аҳволга келиб қолган эди. Маҳалла саъй-ҳаракати билан бу кўчаларнинг эски симёғочлари йиғиб олинди ва ўрнига бетон симёғочлар ўрнатилди. Авваллари яроқсиз йўл ва эски симёғочлар тўфайли одамлар мазкур кўчаларда эркин ҳаракатлана олмаган бўлса, эндиликда бу машаққатлар ортда қолди.

Шу билан бирга, Пўлатчилар ва

Орзу-файз кўчаларида давлат-хусусий шерикчилик асосида очилган 25-50 ўринли боғчалар фаолият бошлагани аҳолини қувонтирди. Чунки маҳаллада аввал боғча бўлмагани боис аҳоли фарзандларини бошқа маҳаллалардаги мактабгача таълим муассасаларига юборишарди. Қиш кунлари болалар узоқдаги боғчаларга бориб келганда шамоллаб қолар, ота-оналар юрак ҳовучлаб ўтирарди. Энди улар фарзандларини ўз маҳалласидаги боғчага беҳавотир юборишади.

Одамларнинг кўзидаги қувончдан шунини билиш мумкинки, бугун улар маҳалла раиси фаолиятидан мамнун. Ўзгаришлар нафақат маҳаллага, балки одамлар ҳаётига ўзгача файз олиб келди. Барча шароитларга эга маҳалла маркази ходимларининг янада ғайрат билан ишлашига замин яратмоқда.

Бир сўз билан айтганда, маҳалладаги бу каби ўзгаришлар юртимизда олиб борилаётган ислохотлар самарадорлигини таъминлаш билан бирга, аҳоли турмуш фаровонлигини оширишга хизмат қилмоқда.

Мансурбек ЖАББОРОВ.



МАҲАЛЛАДАНИМАГАН?

## Вилоят ҳокими сайёр қабул ўтказди

Бухоро шаҳрида вилоят ҳокими Ботир Зариповнинг навбатдаги сайёр қабули ташкил этилди. Унда нафақат Бухоро шаҳри, балки вилоятнинг барча ҳудудларидан 312 нафар фуқаро иштирок этди.

Аҳоли муаммолари билан танишиш жараёнида фуқаролар томонидан электр энергияси, ишсизликни бартараф этиш, қишлоқ ички йўлларини таъмирлаш, даволаш, ишга жойлаштириш, моддий ёрдам, тадбиркорлик, уй-жой ажратиш, суд-ҳуқуқ масалалари кўтарилди.

Ҳар бир мурожаат тегишли соҳа масъуллари иштирокида кенг муҳокама қилиниб, уларни ҳал этиш чоралари кўрилди. Хусусан, 93 нафар фуқаро шахсан вилоят ҳокими қабулида бўлиб, муаммолари билан юзланди. 9 та муро-

жаат жойида ҳал этилди.

— Кўп йиллардан бери диск чурраси касаллиги билан хасталаниб ётгандим, — дейди Бухоро шаҳрида яшовчи Матлуба Марзиева. — Оилавий шароитимиз оғирлиги тўфайли даволашга имконимиз бўлмади. Охири ҳокимиятга мурожаат қилишга мажбур бўлдим. Мурожаатимиз инobatга олиниб, ҳокимлик кўмаги билан операция қилиндим. Ҳозирда аҳволим жуда яхши. Шу билан бирга, уй-жойимизни таъмирлаб беришди. Бугун қабулга миннатдорлик билдириш учун келдим.

Қолган мурожаатлар бўйича муддат белгиланиб, ижроси вилоят ҳокимлиги томонидан назоратга олинган бўлди. Шунингдек, фуқароларга мурожаатлар юзасидан ҳуқуқий тушунтиришлар берилди.





РЕСПУБЛИКА БЎЙИЧА 760 НАФАРГА ЯҚИН ҲОКИМ ЁРДАМЧИСИ САЛОҲИЯТЛИ КАДРЛАР РЕЗЕРВИГА КИРИТИЛГАН БЎЛСА, ШУНДАН 61 НАФАРИ ТОШКЕНТ ШАҲРИГА ТЎҒРИ КЕЛАДИ

## Маҳаллалардан салоҳиятли кадрлар саралаб олинди

Бугун юртимизда давлат фуқаролик хизмати фаолияти самарадорлигини оширишга катта эътибор қаратилиб, ушбу йўналишда кенг кўламли ислохотлар амалга оширилмоқда. Жумладан, Президент Шавкат Мирзиёев раҳбарлигида 2022 йил 4 август куни кенгайтирилган тарзда ўтказилган видеоселектор йиғилишида маҳаллалардаги ҳоким ёрдамчилари, ёшлар етакчилари ва хотин-қизлар фаоллари орасидан юқори натижаларга эришган 1 000 нафарини Салоҳиятли кадрлар резервига киритиш кўрсатмаси бўйича олиб борилаётган ишлар фикримиз исботи бўла олади. Айни шу кўрсатмага кўра, маҳаллалардаги ҳоким ёрдамчилари, ёшлар етакчилари ва хотин-қизлар фаоллари орасидан энг муносиб номзодларни Салоҳиятли кадрлар резервига киритиш ишлари бошланди.

Бугун пойтахтимиздаги 584 та маҳалла фуқаролар йиғинларининг ҳар бирида ҳоким ёрдамчилари, ёшлар етакчилари ҳамда хотин-қизлар фаоллари фаолият олиб бормоқда. Эътиборли жиҳати, шу кунгача бу кўрсатмага асосан, республика бўйича 760 нафарга яқин ҳоким ёрдамчилари Салоҳиятли кадрлар резервига киритилган бўлса, шундан 61 нафари Тошкент шаҳрига тўғри келади. Ҳоким ёрдамчилари орасида туман ҳокими ўринбосарлари, солиқ идораларида ва банк тизимида раҳбар лавозимларда фаолият олиб борган кадрлар борлигини алоҳида таъкидлаш лозим.

Агентлик филиалларидаги бир неча босқичли саралаш жараёнида маҳаллаларда фаолият олиб бораётган ёшлар етакчилари ва хотин-қизлар фаоллари орасидан энг муносиблари саралаб олинган. Ушбу номзодлар ҳозирда Давлат хизматини ривожлантириш агентлиги, Давлат бошқаруви академияси ва Бош илмий-методик марказ билан ҳамкорликда «Давлат фуқаролик хизматчилари учун ташкил этилган 50 соатлик махсус масофавий малака ошириш курси»ни тўлиқ ўзлаштириб, сертификатга эга бўлишди. Бунда захира номзодлар модуллар асосида мавзуларни ўрганиб боришди.

Янада аниқроғи, 8 та модул ва 3 тадан мавзу бўйича дарс-

ларни тўлиқ ўзлаштиришди. Жумладан, «Маҳалабай» ишлаш тизимини тўғри ташкил этишда давлат органлари ва ташкилотларининг ўрни», «Давлат органлари ва ташкилотлари фаолиятини фуқарога хизмат қилишга йўналтирилганлик» тамойили асосида трансформация қилиш», «Давлат бошқарувида бюрократияга қарши курашнинг замонавий механизмлари» каби мавзулар юзасидан малака оширишди. Ҳар бир мавзу бўйича маъруза матни, видеоматрица ва машқлар мавжуд бўлиб, бу орқали ходимлар сиёсий, иқтисодий, ижтимоий ишлаб касбий билим ва кўникмага эга бўлишди.

Алоҳида қайд этиш керакки, кадрлар резервига олинган янги даврнинг янги раҳбарлари ўз салоҳиятини доимий тарзда ривожлантириб бориш тизими-га кўра, шахсий ривожланиш режасини ишлаб чиқиши ҳамда уни амалиётга татбиқ этиши, лидерлик ва бошқарувга оид китоб ўқиши, шахс сифатида ўзини доимий ривожлантириб бориши лозим, уларининг илмий-ижодий фаолиятидаги эришган ютуқлари мониторинг қилиб борилади. Шунингдек, масофавий таълим платформаси орқали онлайн малака ошириши, Давлат бошқарув академиясидаги малака ошириш курсларида иштирок этиши, вазирлик, идора ва маҳаллий ҳокимликларда амалиёт ўта-

“ АМАЛИЁТДАН МАҚСАД — НОМЗОДЛАРНИНГ БИЛИМ ВА КЎНИКМАЛАРНИ МУСТАҲКАМЛАШ ҲАМДА АМАЛИЁТ БИЛАН УЙҒУНЛИгини ТАЪМИНЛАШ, ЎЗЛАРИНИНГ ХИЗМАТ ВАЗИФАЛАРИНИ САМАРАЛИ АМАЛГА ОШИРИШ УЧУН КАСБИЙ МАЛАКА ВА БОШҚАРУВ МАҲОРАТИНИ ОШИРИШДАН ИБОРАТ. ШУ БИЛАН БИРГА, УЛАРНИНГ РЕЙТИНГИ ҲАМ ШАКЛЛАНТИРИБ БОРИЛАДИ. ”

ши керак. Ва ниҳоят сўнги босқичда барча босқичлардан муваффақиятли ўтган энг муносиблари хорижий стажировкага юборилади ва раҳбарлик лавозимларига тавсия этилади.

Демак, айни пайтдаги ҳолатга кўра, эндиликда масофавий малака ошириш курсларини тамомлаган номзодлар вазирлик ва идораларнинг ҳудудий бошқармаларида, маҳаллий ҳокимликларда 2 ҳафта давомида амалиёт ўташади. Амалиётдан мақсад — номзодларнинг билим ва кўникмаларни мустаҳкамлаш ҳамда амалиёт билан уйғунлигини таъминлаш, ўзларининг хизмат вазибаларини самарали амалга ошириш учун касбий малака ва бошқарув маҳоратини оширишдан иборат. Шу

билан бирга, уларнинг рейтингини ҳам шакллантириб борилади. Агентликнинг ҳудудий филиаллари амалиёт ишларини мувофиқлаштириб боради.

Хулоса қилиб айтадиган бўлсак, инсон ресурслари ва кадрлар салоҳиятини ривожлантириш ва ҳар бир лавозимга муносиб номзодларни танлаш орқали иқтисодиётимиз ўсишига эришилади ҳамда юртимиз тарққиёти ва равнақига ўзининг ижобий таъсирини кўрсатади, деб ўйлаймиз.

**Марям АБДУКАРИМОВА,**  
Давлат хизматини ривожлантириш агентлигининг Тошкент шаҳар филиали бош инспектори.

МАҲАЛЛАДАНИМАГАН?

## Ҳар бир оиланинг рақамли паспорти бўлади

Ҳар бир ҳудуднинг ижтимоий-иқтисодий ҳолатидан келиб чиқиб, «ўсиш нуқтаси» белгиланган. Тошлоқ туманидаги «Пиёзчилик» маҳалласида оилавий тадбиркорлик, хўнарамдчиликка асосий эътибор қаратилган.

2022 йилда маҳаллада хўнарамдчилик йўналишида тадбиркорлик фаолиятини йўлга қўйиш истагидаги 50 та оилага 650 миллион сўмга яқин имтиёзли кредит ажратилди, натижада 150 дан зиёд янги иш ўринлари яратилди.

Айни пайтда маҳаллада 200 дан кўпроқ оилада хусусий тадбиркорлик, хўнарамдчилик фаолияти йўлга қўйилган. Шунингдек, 30 нафар хотин-қиз



ўз тадбиркорлиги орқали иш ўринлари яратишга эришмоқда.

2023 йилда аниқ режалар белгиланган бўлиб, маҳалладаги ҳар бир оиланинг ягона рақамли паспортини ишлаб чиқиш кўзда тутилмоқда. Бунда ҳар бир оила учун кам-

бағалликдан чиқариш бўйича алоҳида дастурлар тузилади. Бандлик дастури ишлаб чиқилиб, касб-хўнарга ўқитиш, тадбиркорлик лойиҳаларини амалга ошириш чоралари кўрилади.

**Мухбиримиз.**



## Ҳоким ёрдамчиси ташаббускор бўлса, маҳаллада муаммо қолмайди



**ЭНДИЛИКДА ҚАЙСИ МАҲАЛЛАДА ҲОКИМ ЁРДАМЧИСИ ХАЛҚ ДАРДУ ТАШВИШИ БИЛАН ЯШАБ, ТАШАББУСКОРЛИК КЎРСАТСА, ЎША ҲУДУД ИЖТИМОЙ МУАММОЛАРДАН ХОЛИ, ОБОД ВА ФАРОВОН МАСКАНГА АЙЛанаДИ**

**Сурхондарё вилояти Олтинсой тумани «Мингчинор» маҳалласи аҳолиси кўп йиллар электр энергияси таъминотидан азият чекиб келди. Чунки яқка тартибда уй қурган одамлар хонадонларига ўз имкониятларидан келиб чиқиб ёғоч устун ўрнатди. Дуч келган жойдан турли ўлчамдаги электр симларини тортди.**

Белгиланган меъёрлар асосида ўрнатилмаган ёғоч устунлар, электр симлари йиллар ўтиши билан яроқсиз ҳолга келиб қолди. Маҳаллада янги уй-жойлар қурилиши эвазига трансформатор зўриқиш билан электр энергияси узатди. Бу ҳолатлар тез-тез носозлик келиб чиқишига сабаб бўлди. Ҳудудда бешта маҳаллага хизмат кўрсатадиган туман тиббиёт бирлашмасининг ҳудудий бўлими ҳам бор. Мўъжазгина 10 ўринли туғуруқ ва 10 ўринли болалар терапиясидан иборат шифохона таъмирталаб бўлиб қолган эди.

Президентимиз ташаббуси билан тадбиркорликни ривожлантириш, аҳоли бандлигини таъминлаш ва камбағалликни қисқартириш масалалари бўйича ҳоким ёрдамчиси лавозими ҳамда «Ташаббусли бюджет» лойиҳаси жорий этилгач, бу муаммолар ўз ечимини топди.

Маҳаллада Ақром Турдиев ҳоким ёрдамчиси лавозимида иш бошлагач, аҳоли мурожаатлари асосида бу масалаларнинг ечимини

излай бошлади. Ўтган йили аҳоли билан маслаҳатлашган ҳолда дастлаб маҳалладаги шифо масканини тубдан реконструкция қилиш учун «Ташаббусли бюджет» лойиҳасининг биринчи босқичида иштирок этди. Етарли овоз тўплаб 800 миллион сўм маблағни қўлга киритди.

— Туманнинг тоғли ҳудудига яқин бўлган маҳалламизда барпо этилган бу шифо маскани жиддий таъмирга муҳтожлигини мутасаддилар билса-да, маблағ масаласи ечилмагани учун орқага сурилиб келаётган эди, — дейди ҳоким ёрдамчиси Ақром Турдиев.

— Аҳолига бундай ижтимоий муаммоларни ҳал этиш учун мамлакатимизда мазкур лойиҳа ишга тушганини айтиб, у овоз бериш йўли билан ошқора ҳал бўлишини тушунтирдим. Бу жараёнда иштирок этиш учун «Очиқ бюджет» ахборот порталида рўйхатдан ўтиб, ўз таклифимизни қўлдирдик. Белгиланган муддатда таклифимиз ишчи гуруҳ томонидан модерациадан ўтгач, ахборот портали орқали овоз бериш бошланди. Ҳали бундан

ганимиздан сўнг реконструкцияга етарли маблағ молиялаштириб берилди.

Тиббиёт бўлимида 85 нафар тиббиёт ходими беморларга хизмат кўрсатади. Бўлим бош шифокори Рустам Мавлоновнинг айтишича, олинган маблағдан самарали фойдаланилиб шифо маскани биноси маҳаллага кўрк бағишлайдиган янги қиёфада бўй кўрсатди. Қурувчилар барча ишларни тез ва сифатли бажарди. Тиббиёт ходимлари учун ҳам, беморлар учун ҳам етарли шароит яратилди.

Маҳалладаги 917 та хўжаликда 5 минг 434 киши истиқомат қилади. Маҳалладаги ҳоким ёрдамчиси уларнинг электр энергияси таъминотидаги авария ҳолатларидан чекаётган азиятини ҳам «Очиқ бюджет» ахборот портали орқали ҳал этишга бел боғлади. Ўтган йили «Ташаббусли бюджет» лойиҳасининг иккинчи босқичида қатнашиб, ёғоч электр устунларни бетон устунларга алмаштириш ва янгидан электр симларини тортиш учун бир миллиард сўм маблағ

ғолибга айланди.

— Ажратилган маблағ эвазига 8 километр масофадаги ёғоч устунлар тўлиқ алмаштирилиб, янги электр симлари тортилади, — дея суҳбатни давом эттиради Ақром Турдиев. — Шунингдек, бу маблағдан ташқари, туман электр тармоқлари корхонаси иккита трансформатор ўрнатиб беради. Шу кунларда бетон устунлар ўрнатилмоқда. Бу ишлар якунига етгач маҳалламиздаги ҳар бир хонадон етарли кучланишга эга электр энергияси билан таъминланади.

Маҳалла аҳолиси кўп йиллик орзулари ушалаётганидан беҳад мамнун. Демак, эндиликда қайси маҳаллада ҳоким ёрдамчиси халқ дарду ташвиши билан яшаб, ташаббускорлик кўрсатса, ўша ҳудуд ижтимоий муаммолардан холи, обод ва фаровон масканга айланади. «Мингчинор» маҳалласида амалга оширилаётган ишлар бунга яққол мисолдир.

**Ҳолмўмин МАМАТРАЙИМОВ,  
ЎЗА.**

МАҲАЛЛАДАНИМАГАН?

## Вилоят ҳокими илк сайёр қабулни Самарқандда ўтказди

**С**амарқанд вилояти ҳокими Эркинжон Турдимов жорий йилдаги илк сайёр қабулини Самарқанд шаҳрида ўтказди. Ҳоким билан бирга вилоятнинг яна уч сектор раҳбари, вилоят Халқ қабулхонаси мудири ва бошқа масъуллар иштирокида ўтказилган қабулда туман ва шаҳарлардан келган фуқаролар иштирок этди.

Аҳоли турли масалалар юзасидан мурожаат қилди. Хусусан, соғлиқни сақлаш, таълим, бандлик, меҳнат қонунчилигига риоя

қилиш, уй-жой коммунал хўжалиги муаммолари, шаҳарсозлик меъёрларининг бузилиши, оилавий низолар, мансабдор шахслар фаолиятидаги камчиликлар ва ҳуқуқни муҳофаза қилувчи органларнинг ҳаракатсизлиги ва бошқа масалалар бўйича мурожаатлар эшитилиб, ҳар бир муаммо назоратга олинди.

Ақсарият масалаларга масъуллар иштирокида шу ернинг ўзида ечим топилди. Мисол учун, Самарқанд шаҳрида яшовчи Т.Конавалова уйда яшаш учун шароити йўқлигини билдириб, вилоят ҳокимидан ёрдам сўради.

Ушбу масала дарҳол назоратга олиниб, шу куннинг ўзида фуқаронинг уйига мебель ва бошқа жиҳозлар етказиб берилди. Ноғиронлиги бўлган шахслар ёки оғир хасталикка чалинган фуқаролар, мураккаб жарроҳлик амалиёти ўтказиш зарурати бўлган кишиларга ҳар томонлама ёрдам бериш бўйича чора-тадбирлар белгиланди.

Албатта, қабул давомида тўрт мучаси соғ бўлса-да ёки қўлидан иш келадиган оила аъзолари бўла туриб, боқимандалик кайфиятида ҳокимлик ва раҳбарлардан ёрдам сўраганлар ҳам бўлди. Бундай кишиларга ишга жойлашиш ёки

бирор-бир касб-хунар ўрганиб, рўзғор тебратиши учун ёрдам бериш тушунтирилди. Ноқонуний талаб ва асосиз мурожаатлар рад этилди.

Олти соатдан ортиқ давом этган сайёр қабулда жами 822 та мурожаат кўриб чиқилди. Мурожаатлар, асосан, Самарқанд шаҳри аҳолисидан тушди. Шунингдек, Пастдарғом, Пайариқ ва Самарқанд туманларидан келган фуқаролар ҳам кўпчиликни ташкил этди. Ҳар бир мурожаатни қонунчиликда белгиланган муддатда кўриб чиқиш юзасидан масъулларга топшириқлар берилди.



## Имтиёз ва эркинлик таракқиётга йўл очяпти

**ТАДБИРКОРЛИК ҚИЛИШ ИСТАГИДАГИ ЁШЛАРГА, ХОТИН-ҚИЗЛАРИМИЗГА ИМТИЁЗЛИ КРЕДИТЛАР АЖРАТИЛМОҚДА. АҲОЛИ МУАММОЛАРИНИ БАРТАРАФ ҚИЛИШ УЧУН АНИК ДАСТУРЛАР АСОСИДА ИШ ОЛИБ БОРИЛМОҚДА**



**Наманган вилояти марказидан 60 км. узоқликда, Чуст туманининг Ахча қишлоғида 4 та маҳалла мавжуд бўлиб, «Кўча» маҳалласида 3,5 минг нафардан ортиқ аҳоли яшайди. Маҳалла аҳолисининг асосий даромад манбаи томорқачилик ҳисобланади.**

Кейинги йилларда барча ҳудудларда бўлгани каби мазкур маҳалла саноатлашди. Кўплаб тадбиркорларга давлатимизнинг имтиёз ва эркинликлари катта имконият эшикларини очди.

Маҳалла ҳудудида бўш ётган 1 гектарлик майдон ёш тадбиркор Зоҳиджон Қобиловга берилгач, у қурилиш материаллари ишлаб чиқаришни йўлга қўйди. Замонавий дастгоҳлар, транспортлар харид қилиб, буюртмачилар талабига мос фиш ва шлакаблок ишлаб чиқара бошлади. Ҳозирда яхши даромад топиб, 30 нафардан ортиқ ишчи-ҳодимлар бандлигини таъминлаган.

— **Тадбиркорларга имкониятлар кўп, — дейди З.Қобилов.** — Барча шароит мавжуд. Ҳаракат қилсангиз, мақсадга етиш муаммо эмас. Келгусидаги режими фаолиятимизни янада кенгайтириш, янги иш ўринлари яратиш, муҳими — маҳалладошларимизни иш билан таъминлаш.

Аъзамжон Асқаров мебель ишлаб чиқаришга ихтисослашган оилавий тадбиркорлардан бири. Мебель саноатида қизиққани туфайли ўтган йили кичик корхона ташкил этди. Кўп функцияли дастгоҳлар сотиб олди. Фаолиятини бошлаш баробарида 4 нафар қишлоқ-

дошини иш билан таъминлади. Тажрибаларини ошириб бораётгани учун бугунги кунда унинг маҳсулотларига талаб юқори бўлиб бормоқда.

— **Давлатимиз ғамхўрлиги билан биз тадбиркорларга кенг имконият яратиб берилди, — дейди А.Асқаров.** — Ҳозирда ўз оиламни моддий таъминлаш билан бирга, яна 4 та иш ўрни яратганман. Режамизга кўра, 2023 йил давомида иш ўринлари сонини 10 тага етказишни кўзлаяпмиз.

Маҳаллада тадбиркор хотин-қизларни қўллаб-қувватлашга катта эътибор қаратилмоқда. Нозима Юсупова хона-

дониди тикувчилик цехи ташкил этган. Банкнинг 32 миллион сўм имтиёзли кредитига 7 та тикув машинаси харид қилди ва маҳалладаги ишсиз аёлларни ёнига олди. Ҳозирда буюртма асосида кийим-кечак етказиб бормоқда.

— **Айни кунда 6 та тадбиркорлик субъекти мавжуд бўлиб, улар 10 дан ортиқ маҳсулот ишлаб чиқаришга ихтисослашган, — дейди маҳалла раиси Фарҳоджон Рисқибоев.** — «Маҳаллабай» ишлаш тизими

**«МАҲАЛЛАБАЙ» ИШЛАШ ТИЗИМИ ОРҚАЛИ БАРЧА МУАММОЛАР ЕЧИМ ТОПМОҚДА. ТАДБИРКОРЛИК ҚИЛИШ ИСТАГИДАГИ ЁШЛАРГА, ХОТИН-ҚИЗЛАРИМИЗГА ИМТИЁЗЛИ КРЕДИТЛАР АЖРАТИЛМОҚДА. АҲОЛИ МУАММОЛАРИНИ БАРТАРАФ ҚИЛИШ УЧУН АНИК ДАСТУРЛАР АСОСИДА ИШ ОЛИБ БОРИЛМОҚДА.**

орқали барча муаммолар ечим топмоқда. Тадбиркорлик қилиш истагидаги ёшларга, хотин-қизларимизга имтиёзли кредитлар ажратилмоқда. Аҳоли муаммоларини бартараф қилиш учун аниқ дастурлар асосида иш олиб борилмоқда.

Қувонарлиси, маҳаллада тадбиркорликни ривожланиши, бизнес эгаларининг қўллаб-қувватланаётгани ишсизликни бартараф этишга ёрам бериб, аҳоли фаровонлигини таъминлашга ҳисса қўшмоқда.

**Дилдора МАМАДИЁРОВА,**  
журналист.

### МАҲАЛЛАДА ШИМАТГА?

## Ўксик кўнгилларни шод айлаб...

**К**изилтепа туманидаги «Бунёдкор» маҳалласидан Лобар Ризаева турмуш ўртоғи дунёдан ўтгач, уч нафар гўдагига ҳам она, ҳам ота бўлишига тўғри келди. Баъзида икки жон қийналиб тортадиган рўзғор юки бир ожизага оғирлик қилиши табиий, кўнгли ўксик болаларини едириб-ичириш, кийинтириш ва ўқитиш унга осон бўлаётгани йўқ...



Яхшиям, атрофда унга беғараз ёрдам қўлини чўзувчи инсонлар, ташкилотлар бор. Жумладан, «Маҳалла» хайрия жамоат фонди туман бўлимидагилар боқувчисини йўқотган аёлдан кўнгли сўраб, уни ва фарзандларини гоҳ озиқ-овқат маҳсулотлари, гоҳида бошқа нимадир совға билан йўқлаб туришади.

— **Кимдир фарзандларинг кам-кўстини сўраб, кўнглингга далда бўлса, ўзингни жамиятга керакли эканингни ҳис қилар экансан, — дейди Лобар Ризаева.** — Айниқса, байрам ва қутлуғ саналарда болаларимни совғасиз қолдиришмаганидан миннатдорман. Ахир, мен учун бу дунёда гўдақларимдан ортиқ бойлик, уларнинг кулгусидан зиёда бахт йўқ.

Туманнинг «Сўфиён» маҳалласида яшовчи Ашур бобо Қувватов 102 ёшда. Отаҳон дамбадам соғлигидан хабар олишга келувчи «Маҳалла» фонди ходимларини дуо қилади.

— **Кексаликда бир кун соғ, бир кун бемор бўлар экансан, — дейди Ашур бобо Қувватов.** — Ана шундай паллада йўқловчилар, ҳолингдан хабар олувчилар кўп бўлса, қийинчиликларни сезмас экансан. Мана, Фонд ходимлари дори-дармонларимга қарашишяпти, барака топишсин. Биз каби кексалар бундай эътибордан мамнунмиз.

Дарҳақиқат, яхшилик қилиш, ўксик кўнглига таскин бериш — катта савоб. Фонднинг Қизилтепа тумани бўлими ҳузуридаги «Саховат ва кўмак» жамғармаси томонидан 2022 йилда 3 870 нафар фуқарога 4 миллиард 226 миллион сўмдан ортиқ моддий ёрдам берилди. Жумладан, эҳтиёжманд оилалар ва яққа-ёлғизларга 532 миллион сўмликдан ортиқ озиқ-овқат маҳсулотлари олиб берилди. 563 нафар фуқарога 1 миллиард 677 миллион сўмдан ортиқ моддий ёрдам кўрсатилди.

— **Ўтган йили 53 та «Темир дафтар»га киритилган оилаларнинг хонадонлари бепул таъмирлаб берилди, «Аёллар дафтари»га киритилган 29 нафар хотин-қизга тикув машиналари олиб берилди, — дейди «Маҳалла» хайрия жамоат фонди Қизилтепа бўлими раҳбари Шокир Ҳабибов.** — Бундан ташқари, боқувчисини йўқотган оилаларнинг фарзандлари ўқиши учун тўлов-контракт пулларини тўлашга ҳам ёрдам берилляпти.

«Инсонга эътибор ва сифатли таълим йили»да бу каби хайрли ишлар кўлами янада кенгайди, шубҳасиз.

**Холбиби САФАРОВА,**  
журналист.



БУ ЕРДА КЎЧАТ  
ЕТИШТИРИШНИНГ ҲАҚИҚИЙ  
БИЛИМДОНИГА АЙЛАНГАН  
ТОМОРҚАЧИЛАР ЖУДА КЎП.  
ҲАР БИР ХОНАДОНДА ЎЗ  
ИШИНИНГ УСТАЛАРИ БОРКИ,  
УЛАРНИНГ ТАЖРИБАСИГА  
БАРЧАНИНГ ҲАВАСИ КЕЛАДИ

## Кўчатчилик «Паканди»даги хонадонларнинг даромадди ва баракасига айлانган

Чироқчи туманидаги «Паканди» маҳалласи аҳли азалдан кўчатчилик билан машғул бўлиб, маҳаллий эҳтиёждан ташқари қўшни туман бозорларига помидор, булғор қалампир, карам, бақлажон, қулупнай кўчатлари етказиб беради.

Аммо бугунги кунда томорқалардан янада унумли фойдаланишда илгариги кўп жойни эгаллаб ётадиган дарахтзорлардан воз кечиб, пакана ва ярим пакана интенсив мевали дарахт кўчатларини экмасдан, картошка уруғчилигини ривожлантирмасдан, «Бир маҳалла – бир маҳсулот» тамойилини жорий этмасдан туриб, муваффақиятга эришиб бўлмайди. Бу ҳақиқатни пакандиликлар яхши англагани учун бу ҳудудда томорқасидан унумли фойдаланаётган фуқароларни топиш мушкул.

Шу билан бирга, томорқачи-

лар бошини қовуштирадиган, уларни сифатли уруғлик, минерал ўғит, тайёр маҳсулот бозорини топиб берадиган ташкилот йўқлиги айрим ҳолларда уларнинг фаолиятига салбий таъсир ўтказарди. Мисол учун, маҳаллада деярли ҳар бир хонадон картошка етиштиради, бироқ картошка уруғларини улар ҳар жойдан харид қилишади. Шу боис ўтган йили уруғни шу ернинг ўзида тайёрлаш ва аҳолини таъминлаш бўйича картошкачилик кооперацияси тузилди. Наманганнинг Чуст туманидан келган боғбонлар ўзлари билан олиб келган

пайвандли интенсив ярим пакана кўчатларни томорқаларга экиб кўрсатишди. Қисқа фурсатда омилкор томорқачилар бу усулни ўзлаштириб олишди.

Аслида, кўчат етиштириш жуда нозик иш. Уруғдан чиққан кўчатлар кичик идишларга экиб чиқилади. Кўчатларга қаров, ишлов беришда ҳар бир жараён ўз вақтида бажарилиши, иссиқхонанинг ҳарорати бир хил даражада ушлаб турилиши керак. Бу томорқачидан катта масъулият, эътибор ва тинимсиз меҳнатни талаб этади. Шундагина сифатли кўчатлар олинади. Кўчат бақувват бўлса, харидори кўп бўлади.

Маҳалладаги намунали томорқачи Дилмурод ота Сатторов 6 сотих ерда «дуга» услубида иссиқхона ташкил қилиб, унда помидор, бодринг, карам, бақлажон, булғор қалампирининг серҳосил ва эртапишар нави кўчатларини етиштиришда ном қозонган. Рафиқаси Насиба Эргашова билан тиним билмай меҳнат қилишади ва роҳатини кўришмоқда. Томорқада йўқ нарсанинг ўзи йўқ.

— Ошириб-тошириб гапирини ёмон кўраман, — дейди Дилмурод ота. — Мана кўриб турибсиз, 20 сотих томорқадан йил бўйи тер тўкиб ишласам, еган-ичганимиздан ташқари, 50 млн. сўм даромад топаман. Бозорга баҳор ойларида помидор, булғор қалампир, аччиқ қалампир, карам кўчатларини чиқараман. Бодринг, помидор, картошка, кўчатлар етиштираман. Томорқамда бўш ер йўқ, ҳамма юмушларни рафиқам билан бирга бажарамиз.

Боғбоннинг айтишича, ҳар бир «дуга» услубидаги кичик иссиқхоналарда 40-50 минг туп атрофида кўчат етиштирилади. Бунда ер остига ярим метр қалинликда нури солиб, устига тупроқ тўкиб, кўчат экилади. Бунинг самараси шуки, ер иссиқ бўлади. «Дуга» қилиб, кўчат усти ёпилади, иссиқхона икки қават «плёнка» билан беркитилади. Ана шу тажрибани томорқачилар қўлласа, яхши ва дуркун кўчат етиштириш мумкин экан. Бундан ташқари,

отaxon серҳосил полиз экини кўчатларини «стакан» усулида доналаб экишни ҳам йўлга қўйган. Юпқа пўчоқ, серҳосил навли кўчатларга вилоятдаги кўплаб туманлардан харидорлар бор.

Айтиш керакки, кўчатнинг серҳосил ва эртапишар навларини етиштиришда ўзига хос тажриба яратган бу маҳалла томорқачилари фаолиятини кенг тарғиб қилиш мақсадида ўтган йили вилоятдаги барча ҳоким ёрдамчилари иштирокида маҳаллада амалий семинар ташкил этилган эди. Бугун айнан «Паканди тажрибаси» асосида кўчатчилик йўналишларини йўлга қўйган маҳаллалар сони вилоятда салмоқли.

— Маҳалламиздаги ҳар бир оила томорқадан унумли фойдаланиш ҳисобига катта даромад олади, — дейди «Паканди» маҳалла фуқаролар йиғини раиси Ҳамдам Ниёзов. — Аҳоли томорқасидаги иссиқхоналарда етиштирилаётган маҳсулотлар халқимиз дастурхонининг мўл-кўллигини таъминлаётган бўлса, помидор, булғор қалампир, аччиқ қалампир, бақлажон, бодринг кўчатлари вилоятимиздаги аҳоли хонадонларига, фермер хўжаликларига экиш учун етказиб берилмоқда. Афсуски, бу йилги аномал совуқ томорқаларга ўз таъсирини ўтказмасдан қолмади, албатта. Ҳозирда ҳар бир аҳоли томорқасини кўздан кечиряпмиз, зарур техник чораларни кўряпмиз.

Миришкор деҳқон учун ердан қадрлироқ ва бебаҳо неъмат йўқ. Томорқа соҳибининг самарали меҳнати, интилиши, изланиши билан нафақат унинг ўзи, балки кўплар манфаат кўради. Буни айнан пакандилик миришкор кўчатчилар фаолияти мисолида кўриш мумкин. Умуман олганда, бу ерда кўчат етиштиришнинг ҳақиқий билимдонига айланган томорқачилар жуда кўп. Ҳар бир хонадонда ўз ишининг усталари борки, уларнинг тажрибасига барчанинг ҳаваси келади.

Санжар ИБРОҲИМОВ.

### МАҲАЛЛАДА ШИМАГАН?

## Кутубхона ёшлар билан гавжумлашди



Шахрисабз туманидаги «Куллолик» маҳалласида яқин-яқингача хароба бинода қўним топган, бирор фалокат туфайли ўн минглаб китоблар йўқ бўлиб кетиш хавфи муқаррар бўлган кутубхона янги, замонавий бинода фаолият бошлади. 20 минг дон китоб китобхонлар учун ҳозирланди.

Маълумотларга кўра, ўтган йилда 16 минг киши кутубхона хизматидан фойдаланган. Эътиборлиси, уларнинг 10 мингга яқини ёшлардир. «Энг яхши китобхон ўқувчи», «Энг яхши китобхон мактаб», «Зукко китобхон», «Энг яхши китобхон оила» танловлари, ижодий учрашувлар, китоб ярмаркалари ўтказилиб, минглаб киши қамраб олинган.

— Китобхонларга библиографик хизматлар

кўрсатиш билан бирга, ижтимоий тармоқларда турли канал, гуруҳлар фаолиятини йўлга қўйганмиз, — дейди ахборот-кутубхона маркази фойдаланувчиларга хизмат кўрсатиш бўлими раҳбари Нилуфар Улуғмуродова. — Бунда сўралган китобларнинг электрон вариантини топиб берамиз, янги адабиётлар билан таништириб борамиз, машҳур асарлар бўйича турли викторина, танловлар ўтказиб борилади.

Албатта, кутубхоналар ва уларга мос равишда китобхонлар ҳам кўп бўлиши кенг тафаккурли авлод вояга етаётгани, тараққиётдан далолат. Зеро, кутубхона маърифат ўчоғидир.



**«БИР МАХАЛЛА — БИР МАҲСУЛОТ» ТАМОЙИЛИ ОММАЛАШИБ БОРЯПТИ. МАХАЛЛАЛАР ТОМОРҚАДАН ЙИЛИГА 2-3 МАРТА МАҲСУЛОТ ЕТИШТИРИШГА ИХТИСОСЛАШАПТИ. БУГУНГИ КУНДА ШУНДАЙ МАХАЛЛАЛАР СОНИ 4 105 ТАГА ЕТДИ**

Бугун маҳаллаларда томорқадан унумли фойдаланиб, қўшимча даромад топаётган, нафақат ўзи балки, оила аъзоларининг ҳам бандлигини таъминлаётган юртдошларимиз кўпга топилди. Чиндан ҳам, халқимизнинг ерга бўлган муносабати ўзгариб, хонадонлардаги бўш ётган томорқа майдонларидан унумли фойдаланиш кўрсаткичлари ортиб борапти. Томорқачилик мамлакатимизда озиқ-овқат хавфсизлигини таъминлашнинг асосий тизимларидан бирига айланди.

## Томорқада 400 минг аҳоли дастурхонини тўқин, рўзғори бут бўлди

### Яхши тажриба — халқники

Қувонарлиси, айна кунга келиб, томорқачилик аҳоли орасида шунчалик кенг тарқала бошладики, ҳатто бу борада ўз тажрибасини яратган ҳудудлар, қишлоқ хўжалигининг маълум йўналишига ихтисослашган маҳаллалар, 2-3 марта ҳосил олаётган оилалар сони ортиб бормоқда. Жумладан, 5,5 миллиондан ортиқ томорқа ер эгалари ўз ихтиёридаги 509 минг гектар томорқа ер майдонларида деҳқончилик қилиб, юртимизда етиштирилаётган картошканинг 84 фоизи, сабзавот маҳсулотларининг 71 фоизи, полиз, узум ва меваларнинг 55-60 фоизи, чорвачилик маҳсулотларининг 94 фоиздан ортигини етиштирмоқда.

Таҳлилларга кўра, аҳоли томорқаларига экин экиш кўрсаткичи 2018 йилга нисбатан 1,5 баробарга ўсди. Яъни ҳозирги вақтда йилига 988 гектар томорқага экин экилиб, хонадонлардаги ер майдонларидан фойдаланиш са-

марадорлиги 1,94 фоизни ташкил этапти. Шундан 97 минг гектарда узум, анор ва бошқа турдаги мевали дарахтлардан ҳосил олинаётган бўлса, жорий йил 198 минг гектар майдонга тўқсонбости усулида сабзавот экинлари, 384 минг гектарга баҳорги ва 309 минг гектарга тақрорий экинлар экилди. 2022 йил ноябрь-декабрь ойларида аҳоли томорқаларининг 149,2 минг гектар ерида «тўқсонбости» усулида сабзавот етиштирилди. Томорқаларида 15,8 миллион тоннадан зиёд қишлоқ хўжалиги маҳсулотлари дастурхонларга тортиқ қилинди. Бу 2021 йилга нисбатан 110 фоиз кўп дегани.

Хонадонларда жорий этилган самарали тажриба аввал маҳалла, кейин туман, ҳатто республика миқёсида ўрганилиб, оммалаштирилмоқда. Томорқаларида икки ва уч марта ҳосил етиштириб, яхши даромад олиш бўйича ўзига хос мактаб яратган туманлар сони йил

“  
**ЖАСУРБЕК МАХМУДОВ**  
**45 СОТИХЛИ ИССИҚХОНАСИДА**  
**БИР ТУРГА МАНСУБ, АММО**  
**КЎРИНИШИ ВА ТАЪМИ**  
**ҲАР ХИЛ БЎЛГАН ЦИТРУС**  
**МЕВАЛАРИНИ ЕТИШТИРАДИ.**  
**ЛИМОНДАН ТОРТИБ,**  
**МАНДАРИН, КИВИГАЧА БОР. БУ**  
**МЕВАЛАРНИНГ БОЗОРИ ДОИМ**  
**ЧАҚҚОН БЎЛГАНИ УЧУНИ,**  
**ХОНАДОН ЭГАСИ ЙИЛИГА**  
**650 МИЛЛИОН СЎМДАН КЎП**  
**ДАРОМАД ОЛЯПТИ.**  
”

сайин ортиб борапти. 2018 йилда уларнинг сони 18 та эди, бугун 85 тага етди. Хусусан, Амударё, Андижон, Балиқчи, Хўжаобод, Вобкент, Шаҳрисабз, Қизилтепа, Наманган, Булунғур, Каттақўрғон, Сирдарё, Паркент, Чиноз, Олтиариқ, Боғдоқ туманларида томорқа ерларидан фойдаланиш самардорлиги 1,90-1,96 фоизга етказилган.

Уларда кўпроқ боғдорчилик, интенсив сабзавотчилик йўналишлари ривожланган бўлиб, битта оила 10 сотих томорқа майдонида 3 тоннагача помидор, бодринг, 2 тонна саримсоқпиёз, турли хилдаги кўкатлар ҳамда тақрорий экинлардан сабзи, шолғом ва дук-какли экинлар экиб, ўртача 50-60 миллион сўм, баъзилар эса 100 миллион сўмгача даромад олишни йўлга қўйган. Мисол учун, Урганч туманида яшовчи Ҳасанбой Отажонов 12 сотихли томорқасида, асосан, сабзавот етиштириб, йи-

лига уч марта ҳосил оляпти. Даромад меҳнатга яраша — йилига 60-65 миллион сўмдан кам эмас.

Норин туманидаги «Бойовул» маҳалласида яшовчи Жасурбек Маҳмудов 45 сотихли иссиқхонасида бир турга мансуб, аммо кўриниши ва таъми ҳар хил бўлган цитрус меваларни етиштиради. Лимондан тортиб, мандарин, кивигача бор. Бу меваларнинг бозори доим чаққон бўлгани учунми, хонадон эгаси йилига 650 миллион сўмдан кўп даромад оляпти. Ушбу цитрус мевалар кўчати тийёрлаш ҳам алоҳида даромад. Бунинг учун оила томорқасидан 20 сотих жой ажратган. Олинаётган фойда эса 450 миллион сўмдан кам эмас. Жасурбек маҳалладаги 30 кишини иш билан таъминлаган. Ҳудуддаги «Лимончилик ўқув маркази»да эса шу соҳани ўрганиш истагидаги инсонларга доимий равишда билим бериб келмоқда.

### Ҳар мавсумда маҳсулот бор

Томорқадан фойдаланишнинг энг самарали усулларидан яна бири — иссиқхоналар ташкил этиш экани сир эмас. Йилнинг исталган мавсумида ҳосилдор ва бозорбоп маҳсулот етиштириш имконини беради. Бу борада маҳаллалар билан ҳамкорликда аҳолига яқиндан кўмак бериляпти. Иссиқхоналар қуриш учун имтиёзли кредит, субсидиялар ажратилапти. Биргина 2022 йилнинг ўзида 133,3 мингдан ортиқ хонадон ихчам иссиқхоналар қуриш белгиланган. Бу 2021 йилга нисбатан 43 мингтага кўп. Ҳозирга қадар белгиланган режа деярли бажарилиб, 124 мингдан ортиқ хонадон ўз иссиқхонасига эга бўлди.



Хонадонларнинг аксариятида иссиқхоналар 3-4 сотих майдонда қуриб бериляпти. Одамлар ўша ерда сабзавот, кўкат маҳсулотларини етиштириб, 35-40 миллион сўм даромад топяпти. Бир қисмида кўчатчиликни йўлга қўйган оилалар ҳам кўп. Бунинг учун ҳеч қанча жой талаб этилмайди, аммо даромади яхши. Қувонарлиси, жойларда «Бир маҳалла — бир маҳсулот» тамойили оммалашиб борапти. Маҳаллалар томорқадан йилига 2-3 марта маҳсулот етиштиришга ихтисослашапти. Бугунги кунда шундай маҳаллалар сони 4 105 тага етди.

Фалон маҳаллада одамлар узум етиштирар экан, фалон маҳаллада энг зотдор чорва моллари бор, фалон маҳалладан исталганча полиз экинлари топиш мумкин, деган гапларни кўп эшитиб қоламиз. Бу харидорларнинг кўтара маҳсулот олиши учун ҳам қулай. Масалан, ҳозир Қашқадарё вилояти Шаҳрисабз ва Китоб туманларида 10 гектар ерда малина, Қашқадарё туманида 100 гектар ерда помидор, Китоб туманида 300 гектар майдонда анорзор ва тоқзор ташкил этилган. Тошкент вилояти Бекобод тумани «Маллабой» маҳалласида эса 450 дан ортиқ хонадон ўз иссиқхонасида баклажон ва булғор қалампирни етиштириши билан машхур.

Томорқа эгаларига зарур хизматларни кўрсатиш бўйича «Томорқа

хизмати» МЧЖлар кўчат етказиб беришдан тортиб, маҳсулотни сотишгача бўлган жараёнларда яқиндан кўмаклашади. Бугунги кунда юртимизда 3 216 та шундай хизмат кўрсатиш корхоналари ташкил этилган бўлиб, бу кўрсаткич 2021 йилга нисбатан 1500 тага кўп. Маҳсулотни сотиш борасида ҳам ҳудудларда ташкил этилаётган

“  
**ДЕҲҚОНЧИЛИК ВА БОҒДОРЧИЛИККА**  
**ИХТИСОСЛАШГАН МАХАЛЛАЛАРДА**  
**2,5 МИНГТА «ЛИДЕР» ТАДБИРКОРЛАР**  
**АНИҚЛАНИБ, УЛАРГА 165 МИНГ АҲОЛИ**  
**ХОНАДОНЛАРИ КООПЕРАЦИЯ УСУЛИДА**  
**БИРИКТИРИЛГАНИ ЯХШИ САМАРА БЕРЯПТИ.**  
**БУ ОРҚАЛИ 205,6 МИНГ НАФАР АҲОЛИ**  
**БАНДЛИГИ ТАЪМИНЛАНДИ.**  
”

«Дала дўкон»лари алоҳида аҳамиятга эга. Маҳсулотларни сифатли сақлаш учун эса кичик ҳажмли музлаткичлар ташкил этиляпти.

Сув таъминоти оғир ҳудудлардаги аҳоли томорқаларини сўғориш учун вертикал сўғориш қудуқларини қазिश харажатларининг бир қисмини қоплаб

бериш мақсадида тасдиқланган манзилли дастур доирасида 860 нафар талабгорга 72 миллиард сўм субсидия маблағлари ажратилди.

Шунингдек, томорқаларда етиштирилган маҳсулотни харид қилган ҳамда аҳоли хонадонлари билан кооперация асосида иш ташкил этган тадбиркорга оғир хонадонлари билан кооперация қуриши, саралаш ва қадоқлаш ускуналарини харид қилиш харажатларининг 30 фоизи, бироқ 150 миллион сўмдан ортиқ бўлмаган миқдорда субсидия ажратиш мақсадида манзилли рўйхат шакллантирилди. Уларга дастлабки ҳисоб-китоблар бўйича 5,25 миллиард сўм субсидия маблағлари ажратиш режаланган.

Деҳқончилик ва боғдорчиликка ихтисослашган маҳаллаларда 2,5 мингта «лидер» тадбиркорлар аниқланиб, уларга 165 минг аҳоли хонадонлари кооперация усулида бириктирилгани яхши самара бериляпти. Бу орқали 205,6 минг нафар аҳоли бандлиги таъминланди. Томорқа ер эгалари ва кооперацияларни маҳсулот ишлаб чиқаришнинг янги технологияларига ўргатиш мақсадида ҳудудларда амалий ўқув марказлари ташкил этилмоқда.

Умуман, юртимизда томорқачиликни ривожлантириш бўйича яратилаётган имкониятлар асосида 2022 йилда 400 минг нафар фуқаронинг доимий ва мавсумий бандлиги таъминланди.





# «Чўлобод» ўзгача қиёфа касб этди



**ЙИҒИННИНГ ТИНЧЛИК, НАМУНА, БИРЛИК, МАДАНИЯТ, ДЎСТЛИК, КЎЧАЛАРИГА МАҲАЛЛА РАИСИ ТАШАББУСИ БИЛАН ҲАШАР ЙЎЛИ ОРҚАЛИ ШАҒАЛ ЁТҚИЗИЛИБ, ҚИШДА ЛОЙ, ЁЗДА ЧАНГ БЎЛАДИГАН КЎЧАЛАРНИНГ ЙЎЛЛАРИ РАВОН БЎЛДИ**

Халқимизда азалдан сув ўтказган, сув келтирган савоб, деган пурмаъно гаплар юради. Шунинг учун одамлар сув етиб бормаган жойларга сув келтириб, сув тармоқларини таъмирлаб, халқнинг дуосини олишга ҳаракат қилишади. Тошкент вилоятининг Бўка туманидаги «Чўлобод» маҳалла фуқаролар йиғинида ана шундай эзгу ишга қўл урилди.

Айтиш керакки, йиғинда бир неча йиллардан буён тоза ичимлик сувга эҳтиёж бор эди. Аҳоли сувни сотиб олишга ёки узоқдаги қишлоқлардан ташиб келишга мажбур эди. Носоз йўллар, ичимлик сувнинг узоқлиги, узундан-узун навбатлар одамларнинг тинка-мадорини қуритганди. Ҳайриятки, маҳаллага давлат дастури асосида сув қувурлари ётқизирилиб, ичимлик сув келтирилди. Шу билан бирга, ҳудуддаги анча йиллардан буён фойдаланишга яроқсиз ётган иккита сув қудуғи қайта таъмирланди.

— Маҳалламиз туманнинг энг чекка ҳудудида жойлашганлиги сабабли анча йиллардан буён тоза ичимлик сув йўқ эди, — дейди «Чўлобод» маҳалла фуқаролар йиғини раиси Мирзоҳид Холмуродов. — Ичимлик сув бўлмагани учун бошқа қишлоқлардан сув ташиб келардик. Одамларни сувни олиб келишдан кўра, кўпроқ йўлларнинг узоқлиги ва носозлиги ҳолдан тойдирарди. Баъзида қўшни маҳалладагилар йиғинимиз фуқароларига сув бермайдиган ҳолатлар ҳам учраб турарди. Мана, энди одамларнинг азалий орзуси ушалди. Йиғин аҳли маҳалла

ҳудудида кечаётган ислохотлардан мамнун. Одамларнинг сув излаб сарсон бўлганлари энди тарихда қолди.

Маҳалладаги ўзгаришлар бу билан чекланиб қолмайди. Йиғиннинг Тинчлик, Намуна, Бирлик, Маданият, Дўстлик, кўчаларига маҳалла раиси ташаббуси билан ҳашар йўли орқали шағал ётқизирилиб, қишда лой, ёзда чанг бўладиган кўчаларнинг йўллари равон бўлди.

Яна бир муаммо — маҳалла кўчаларидаги эски симёғочлар сабабли ҳар йили қиш фаслида электр таъминоти билан боғлиқ муаммолар кузатилади. Шу боис уларнинг ўрнига 170 дона янги бетон устунлар ва янги симлар тортирилиб, замонавий ёриткичлар ўрнатилди. Маҳаллада жиноятчиликнинг олдини олиш ва жиноятдан ҳоли ҳудудга айлантириш мақсадида марказий кўчалар кузатув камералари билан таъминланди.

Маҳалла ҳудудида жойлашган 340 ўринли мактаб биноси эскиргани, талабга жавоб бермагани боис бузиб ташланиб, давлат дастури асосида 9,2 млрд. сўм маблағ эвазига 540 ўринли янги бино қурилди ва фойдаланишга

топширилди.

— Мактабимиз анча йил аввал қурилган бўлиб, фойдаланишга яроқсиз ҳолга келиб қолганди, — дейди мактаб директори Зафар Холмуродов. — Йиғинимизда қад ростлаган янги мактаб ўқитувчи, ўқувчилар ва маҳалла аҳли учун айни муддао бўлди. Чунки мактабга борадиган ўқувчилар кўпайиб, сиғмай қоларди. Ҳатто уч сменада дарс машғулотлари олиб бориларди. Бу эса ўқувчилар учун бир қанча муаммолар туғдирарди. Қишда иссиқлик тизими ҳам ишламасди. Болалар қалин кийимларда совуқ хоналарда дарс қилишга мажбур эди. Энди ўқувчилар барча шароитларга эга бўлган шинам хоналарда ўқишади.

Бир сўз билан айтганда, маҳалладаги ўзгаришлардан одамлар мамнун. Бундай янгиланишлар, ислохотлар бугун ҳар бир хонадонга кириб борди. Бу жараёнларда маҳалла фаолларининг жонбозлиги, фидоийлиги, шижоати одамларнинг ҳаётга бўлган интилишларини мустаҳкамламоқда.

**Мансурбек ЖАББОРОВ.**

## МАҲАЛЛАДАШМАГАМ?

### Эҳтиёжманд оилаларга кўмир бепул берилди

Амударё туманида ижтимоий ҳимояга муҳтож 66 та оилада яшовчи нуронийларга 10 тонна кўмир бепул тарқатилди.

Республика ҳудудида об-ҳаво ҳароратининг кескин тушиши ва табиий газ босимининг пасайиб кетиши натижасида январь ойи аҳолига бирмунча қийинчиликлар туғдирди. Шу муносабат билан туман марказидан чекка ҳудудларда яшаётган якка-ёлғиз, кам таъминланган, ижтимоий ҳимояга муҳтож оилаларда яшовчи нуронийларнинг кўмирга бўлган эҳтиёжи ўрганиб чиқилди.



Ўрганишлар натижасида «Кўмир таъминот» масъулияти чекланган жамияти Қорақалпоғистон Республикаси филиали томонидан туманга 10 тонна кўмир маҳсулоти олиб келинди ҳамда 66 та ижтимоий ҳимояга муҳтож оилада яшовчи нуронийларга бепул тарқатилди.

Шунингдек, тумандаги Тўлқин овулида яшовчи, 1948 йилда туғилган Жумабой Тиловбоевнинг ногиронлар аравачасига муҳтожлиги аниқланиб, «Нуроний» жамғармаси Қорақалпоғистон Республикаси бўлимининг амалий кўмаги билан аравача олиб келинди ҳамда шу кун эгасига топширилди.

## МАҲАЛЛАДАШМАГАМ?

### Чиқиндидан электр энергияси ишлаб чиқарилади



Тошкент вилояти Оҳангарон туманидаги «Янги ҳаёт» маҳалласида жойлашган чиқинди полигонидagi чиқиндилардан газ олиниб, уни қайта ишлаш ҳисобига электр энергияси ишлаб чиқариш лойиҳаси амалга оширилади.

Айтиш керакки, мазкур полигонга Тошкент шаҳридан ҳар кун 2 минг тоннагача чиқинди ташланади. Чиқиндиларнинг ўз вақтида утилизация қилинмаслиги ва улардан бадбўй ҳид таралишидан маҳаллада яшовчи аҳоли анчадан буён азият чекади. Эндиликда Жа-

нубий Кореянинг «SEJIN G&E Co Ltd» компанияси билан ҳамкорлик йўлга қўйилиб, чиқиндилар қайта ишланади. Бунда полигондаги чиқиндиларнинг усти ёпилиб, улардан газ олинади ҳамда газ қайта ишланиб, электр энергияси ишлаб чиқарилади.

Лойиҳа амалга оширилиши натижасида муқобил электр энергияси олишга эришилиши билан бир қаторда, атмосферанинг ифлосланиши ва бадбўй ҳид чиқишининг олди олинади. Турли эпидемиологик касалликлар келиб чиқишига йўл қўйилмайди ва қўшимча электр энергияси ишлаб чиқарилади.



# СИЗ НИМА ДЕЙСИЗ?

## «Тозалик фаришталари»: Уларнинг дардини ким тинглайди?

«ОВҚАТЛАНИШ ЖОЙЛАРИГА КИРИБ, БИР ПИЁЛА ЧОЙ СЎРАСАК, ҲАТТО НАҚД ПУЛИМИЗГА БЕРИШМАЙДИ. БИЗДАН ОР ҚИЛИШАДИМИ, ЧИҚАРИБ ЮБОРИШАДИ. ГОҲИДА ЖАМОАТ ТРАНСПОРТЛАРИГА ЧИҚАМИЗ ДЕСАК, ПУЛИНИ ТЎЛАСАК-ДА ОЛИБ КЕТИШМАЙДИ. ҲАММА БИЗГА ҒАЛАТИ ҚАРАЙДИ. ХУДДИКИ БИЗ ИККИНЧИ ДАРАЖАЛИ ИНСОНЛАРДЕК...»

Мамлакатимизда юз берган аномал совуқ туфайли кўпчилигимиз иложи борича кўчага чиқмасликка ҳаракат қилдик. Баъзи бир ташкилотлар ходимларини ўйлаб, онлайн ишлаш режимига ўтишди. Кўча совуқ. Зарур бўлганда дўконга чиқаман десангиз, эшикни очишингиз билан совуқ ҳаводан этингиз жимирлайди.

Бироқ мана шундай этни жимирлатадиган совуқда ишлайдиган, эрта тонгдан қалин куртчаларини кийиб, баланд кўнжли этикларда, ишининг кўп вақти кўчада, совуқда ўтадиган соҳа ходимлари бор. Улар — ободонлаштириш хизмати вакиллари. Тўғрироғи, улар қайсидир маънода юртимиз озодалигини таъминловчи «сариқ нимчали» қахрамонлардир. Улар -30 градус совуқда ҳам, +50 градус жазирада ҳам иш қуроллари билан кўчалар озодалигини таъминлаш учун доимо шай. Ойлик иш ҳақи нари-борса ўртача 1,5 миллион сўм бўлган, камига иш вақти белгиланган вақтдан ўтиб кетса-да, ойлиги кам чиқмаслиги учун ҳаётдан зинҳор нолимайди.

Хўш, аномал совуқ кунларда уларнинг ойлик иш ҳақига қўшимчалар қўшиб берилди-ми? Уларга қандай шароитлар яратилди? Ваҳоланки, бу кунларда уларнинг иш ҳажми 2-3 баробарга кўпайган эди.

— Ободонлаштириш бошқармалари ишчи фаррошларига синовли кунларда барча шарт-шароитлар яратиб берилди, — дейди Тошкент шаҳар Ободонлаштириш бош бошқармаси бош иқтисодчиси **Ғайратжон Имагилов**. — Жумладан, уларга махсус иссиқ оёқ кийим, кўлларига қўлқоп, иссиқ чой идишлари, текин егуликлар, ош, иссиқ кофе, тез тайёр бўлувчи овқатлар тарқатилди. Ҳар бир туман Ободонлаштириш бошқармалари ходимларига ойлик иш ҳақидан ташқари, моддий рағбатлантириш жамғармасидан (лавозим окладига ўн фоиз миқдорида) мукофотлар ва моддий ёрдамлар, ҳар ой ўз ишидан ортиқча юкламада ишлайётган ишчи ходимларга йигирма фоизгача устама ҳақ тўланиши таъминланди.

### «МАОШИМИЗГА БИРОН МАРТА ҚЎШИМЧА ҚЎШИШМАГАН»

Бошқарма масъул ходимининг фикрини эшитдик, энди иккинчи томонга — ободонлаштириш ходимларига қўлоқ тутсак.

— Ёзда куннинг жазирамасида, кузда айни ҳазонлар кўпайганда, ҳатто аномал -30 градус совуқда ҳам иш ҳақимизга қўшимча ҳақ қўшиб беришмаган, ҳеч бўлмаса, тушлигимиз учун озроқ пул беришганда бўлар эди, — дейди **Шайхонтоҳур тумани ободонлаштириш хизмати ходими Абдуқодир Саидназаров**. — Одамлар совуққа чиқмасдан уйда ўтирганда, баъзи давлат ишхоналари онлайн иш режимига ўтганда ҳам, оёғимиздан зах ўтиб, совуқда ишладик, ойлигимизни кўтариш у ёқда турсин, ходимлар учун ҳатто транспорт қилиб беришмади. Авваллари биз учун ажратилган автобусга ўзимиз бир ойда пул йиғиб берардик. Аммо бундай совуқда шу ҳам йўқ. Ноилоҳ таксига чиқамиз, совуқ кунларда эса «инсофли» таксичиларимиз йўл кира нархларини 2-3 баробарга қиммат қилиб олишган. Топган пулимнинг ярмидан кўпи йўл кирага кетиб қоляпти. Иш вақтимиз белгиланган вақтдан ўтиб кетса ҳам ишлай-верамиз. Ўн йилдирки, ойлигим ўша-ўша...

### БУ ҲАЛАТНИ КИЙГАНЛАРГА ҒАЛАТИ ҚАРАШАДИ

Урганишларимизга кўра, бугунги кунда Тошкент шаҳрида 12 мингдан ортиқ ободонлаштириш ходимлари меҳнат қилади ва пойтахтимизнинг озодалигини таъминлайди. Ойлик маошининг ошиши — уларнинг кўп йиллик орузи.

— Яқинда тозалаган жойимизга чиқинди ташлаётган одамларни кўриб қолиб, чиқиндини ерга ташламасликларини сўрасак, «ойлигингизни оляпсизлар-ку» деб жавоб қайтаришади, — дейди **ободонлаштириш хизмати ходими Хосият Ҳайитова**. — Овқатланиш жойларига кириб, бир пиёла чой сўрасак, ҳатто нақд пулимизга беришмайди. Биздан ор қилишадими, чиқариб юборишади. Гоҳида шошилишча ҳашарга чақириб қолишганида жамоат транспортларига чиқамиз десак, пулини тўласак-да олиб кетишмайди. Баъзан автобусга чиқиб қолсак, ёнимизда ўтирган одамлар бизга паст назар билан қарагандек бўлиб, кийимларини тортиб қўйишади. Одамларнинг бизга ғалати қарашгани етмагандек, кондукторлар кўп ҳолларда бизни камситишади. Бўлмаса биз ҳаммаёқни тозалаб юрамиз-ку. Мабодо биз бир кун тозалашга чиқмай қолсак, нима бўлишини ўйлаб кўринг. Ҳамма томон чиқиндига тўлиб кетади. Бу ҳалатни кийганларга одамлар ғалати қарашади. Худдики биз иккинчи даражали инсонлардек...

Ободонлаштириш хизмати ходимларининг кўп ҳам кўзга кўринмайдиган меҳнатлари юртимиз кўркига кўрк қўшмоқда. Эрта тонгдан қандай об-ҳаво бўлишидан қатъи назар, шаҳар аҳли ҳали уйғонмаган бир пайтда, ободонлаштириш ходимлари аллақачон ўз ишларини бошлаб юборишади. Бироқ юқоридаги каби ҳолатлар дилни хира қилади. Уларнинг қилаётган меҳнатларини қадрига етишмайди. Совуқда муздан тозаланган йўлақлар, куралган қорлар, супурилган йўлақлар, худдики ўз-ўзидан бўлиб қолгандек қарашади. Улар ҳам одам. Улар ҳам қаттиқ чарчашади, ҳолдан тойишади... Нега уларнинг фидоқорона меҳнатини қадрламаймиз? Нега уларнинг ишига иш қўшамиз?

Хўш, сиз бунга нима дейсиз, азиз маҳалладош?

**Мансурбек ЖАББОРОВ.**

### МАҲАЛЛАДА НИМАГАН?

## «Супурги етиштириб, сира кам бўлмаяймиз»



**С**ирдарё вилоятидаги маҳаллаларнинг ихтисослашувидан келиб чиқиб, «ўсиш нуқта»лари аниқлаб олинган.

Сардоба туманидаги «Зомин», «Бўстон», «Ровот» маҳаллалари супурги етиштириш ва уни тайёр маҳсулотга айлантиришга ихтисослашган. Биргина «Зомин» маҳалласида бу йўналиш аксарият фуқароларнинг қўшимча даромад топиш манбаига айланган.

Маҳалла фаоли Эшпўлат Пиримқуловнинг таъкидлашича, маҳалладошлари шу иш ортидан кам бўлмаяпти. — Супурги етиштириш орқали аҳолимиз қўшимча даромад топмоқда, — дейди **Эшпўлат Пиримқулов**. — Ўтган йили 50 гектар ерда супурги ўстирилди. Табиийки, даромад ҳам шунга яраша яхши бўлди. 1 гектар ердан 2,5-3 минг дона супурги, 2-2,5 тонна дон оли-

нади. Ёшим 70 да бўлса-да, фарзандларга бошман. Бир кунда 4 нафар оила аъзоларимиз билан 1000 донагача супурги тайёрлаб қўямиз.

Қувонарлиси, меҳнати орқали даромад топаётганлар орасида ёшлар, ижтимоий дафтарларга киритилган фуқаролар ҳам бор. Ҳозир ҳудуднинг «драйвер»ига айланган бу фаолиятни кооперация тизимига бирлаштириш режа қилинган. Ушбу режа амалга ошгач, деҳқонларга маҳсулот етиштиришнинг барча бўғинларида молиявий ва амалий кўмак бериш билан бирга, тўғридан-тўғри экспорт ҳам йўлга қўйилади.

Этиборлиси, бугун аксарият маҳалла фуқаролари хонадонидан супурги етиштиришга ихтисослашган. Сабаби, йил давомида иш бор, бандлик таъминланган.

**Мухбиримиз.**





ДИҚҚАТ, ТАНЛОВ!

Ўзбекистон Республикаси  
Маданият ва туризм вазирлиги  
ҳамда «Ўзбекконцерт» давлат  
муассасаси эзгулик, яшариш ва  
янгиликни айёми —  
Наврўз умумхалқ байрами  
муносабати билан

«Наврўзнинг нуборак,  
янги ЎЗБЕКИСТОНИМ!»

қўшиқлар танловини  
эълон қилади.

Танловда таниқли ва ёш хонандалар,  
композитор ҳамда бастакорлар тинчлик  
ва гўзаллик, меҳр-оқибат ва муҳаббат  
ғояларини, инсон қадрини улуғлайдиган,  
юксак ватанпарварлик туйғуларини  
тараннум этадиган янги мусиқий асарлари  
билан иштирок этишлари мумкин.

Танлов учун тайёрлаган  
ижод намуналарингизни  
«Ўзбекконцерт» давлат муассасасининг  
«uzbekkonsert\_navruz» телеграм  
ботига юборинг.

Танловда ғолиб бўлган санъаткор ва  
ижрочилар мамлакатимизда ўтказиладиган  
нуфузли байрам тантаналарида иштирок  
этиш ҳамда қуйидаги пул мукофотларини  
қўлга киритиш имкониятига эга бўлишди:

1-ўрин учун — 50 млн. сўм,  
2-ўрин учун — 40 млн. сўм,  
3-ўрин учун — 30 млн. сўм.

**АРИЗАЛАР ЖОРИЙ ЙИЛНИНГ  
1 ФЕВРАЛИДАН 20 ФЕВРАЛИГА  
ҚАДАР КАБУЛ ҚИЛИНАДИ.**

Танлов ғолиблари 2023 йилнинг  
10 март кuni эълон қилинади.

Қўшимча маълумотларни (95) 194-23-23  
телефон рақами орқали олишингиз мумкин.

**Ўз истеъдод ва маҳоратингизни намоён  
этиб, Наврўзнинг кўрки ва тароватини  
оширишга, гўзал байрамимизни янада  
мазмунли ўтказишга ҳисса қўшинг!**

## «Кўктом»нинг кўчалари кўркамлашиб боряпти

**ОДАМЛАР СУВНИ УЗОҚДАГИ МАҲАЛЛАЛАРДАН ТАШИБ КЕЛИШГА МАЖБУР  
ЭДИ. БУНДАЙ ҚИЛА ОЛМАГАНЛАР ХОНАДОНИДАН ХОВУЗ ҚАЗДИРИБ,  
СУВ САҚЛАРДИ. БУ ҲОЛАТ ЁЗ КУНЛАРИ СУВНИНГ ИФЛОСЛАНИШИ ВА  
БОЛАЛАРНИНГ ҲАР-ХИЛ КАСАЛЛИКЛАРГА ЧАЛИНИШИГА ОЛИБ КЕЛАРДИ**



Бугун ҳудудларни комплекс ривожлантириш ҳақида сўз борар экан, асосий эътибор маҳаллалардаги мавжуд муаммоларни бартараф этишга қаратилмоқда. Шу боис бугун юртимизда ободлик кириб бормаган маҳалла қолмади. Айниқса, «Обод маҳалла» ва «Обод қишлоқ» дастурлари узоқ-яқин маҳаллалардаги одамлар ҳаётига мазмун олиб кирапти.

Қўшқўпир туманининг «Кўктом» маҳалла фуқаролар йиғинида авваллари аҳоли электр энергияси тизимидаги носозликлар, ичимлик сувининг йўқлиги, йўлларнинг таъмирталаблigidан азият чекишарди. Утган йили йиғинда «Обод маҳалла» дастури доирасида кўплаб ишлар амалга оширилди. Жумладан, 29,2 км. электр тармоқларидаги узиллишлар бартараф этилиб, кўчалардаги эскирган симёғочлар ўрнига бетон устунлар ўрнатилди. Барча кўчалардаги электр симлари йиғиб олиниб, янги электр кабеллари тортилди. Ҳудудни электр энергияси билан таъминловчи 12 та трансформатор қайта таъмирланди. Эскирган, аҳолини электр энергияси билан таъминлай олмаётган иккита трансформатор ўрнига янгиси ўрнатилди.

Кўктомликларнинг яна бир муаммоси — тоза ичимлик сув билан боғлиқ эди. Одамлар сувни узоқдаги маҳаллалардан ташиб келишга мажбур эди. Бундай қила олмаганлар хонадонидан ховуз қаздириб, сув ташийдиган машиналар билан тўлдириб қўярди. Бу ҳолат ёз кунлари сувнинг ифлосланиши ва болаларнинг ҳар хил касалликларга чалинишига олиб келарди. Дастур асосида маҳалланинг ҳар бир кўчасига 6,5 км. узунликдаги ичимлик сув қувурлари ётқизилиб, тоза ичимлик сув билан

таъминланди ва йиғинда битта сув иншооти қуриб ишга туширилди.

— *Озгина шамол бўлса ёки ёмғир ёғса, электр токи ўчиб қолмасинда, деб юрак ҳовучлаб ўтирардик, — дейди Олтинкўл кўчасида яшовчи Ирода Собурова.* — Электр симлари эскирганидан шамолда узилиб кетаверарди. Одамлар, айниқса, қишда қийналишарди. Трансформаторлар озгина кучланишни ҳам кўтара олмасди. Ё ёниб кетарди, ё уни тузатгунча ҳафталаб токсиз ўтирардик. Чекка ҳудудда бўлганимиз учун электр таъминоти ходимлари деярли келишмасди. Дастур асосида электр тармоқларидаги муаммолар бартараф этилганидан, эътибордан биз жуда ҳам хурсандимиз.

Бу ҳали ҳаммаси эмас. Нафақат маҳалладаги инфратузилмалар яхшиланди, аҳолига қулайлик яратилди, балки уларнинг бандлигини таъминлаш, ижтимоий ҳимоясини кучайтириш, оилаларга барака олиб кириш борасида салмоқли ишлар амалга оширилди.

Бу ҳақда сўз борганда, маҳалла раиси кўмаги билан қўлида хунари бўла туриб, уйда бекор ўтирган 147 нафар фуқаро доимий иш билан таъминланди. «Аёллар дафтари»га киритилган, боқувчисини йўқотган ижтимоий ҳимояга муҳтож аёллар ўзини ўзи банд

қилиш ҳамда оила даромадини ошириши учун, аввало, маҳсул тикув курсларида бепул ўқитилди, сўнгра субсидия асосида тикув машиналари билан таъминланди. Шунингдек, доимий даромад манбаига эга бўлмаган ҳамда вақтини беҳуда сарфлаётган ёшлар, тадбиркорлик қилиш истагида бўлганларнинг 64 нафарига маҳалла кўмаги билан қишлоқ хўжалиги техникаси, асалари-чилик, паррандачилик, чорвачилик билан шуғулланиши учун имтиёзли кредитлар олиб берилди.

— *Имтиёзли 33 миллион сўм кредит эвазига 22 дона асалари уясини олиб, ўз бизнесимни бошладим, — дейди Кўктом кўчасида яшовчи Ҳакимбой Нуржанов.* — Бу соҳанинг сир-асрорларини ёшлигимда ўрганганман. Бизга асалари-чилик ота мерос касб ҳисобланади. Бунинг устига турмуш ўртоғимнинг асалчилик сирларини хабардорлиги менга қўл келиб, оилавий тадбиркорлигимизнинг кенгайишига ёрдам бермоқда. Келажакда фаолиятимизни кенгайтириб, нафақат юртимиз бозорларига, балки хориж давлатларига чиқини режа қилганмиз.

Умуман олганда, бугун «Кўктом» маҳалласидаги ўзгаришлар ҳар бир кўчада, ҳар бир хонадонда юз бермоқда. Тадбиркорлик қилиш истагида бўлганларга кенг имкониятлар яратиб берилаётгани аҳоли турмуш тарзини янада яхшилаш, бандлигини таъминлаш ва даромадини ошириш, энг муҳими, одамлар ҳаётдан рози бўлиб яшашига хизмат қилмоқда.

Мансурбек ЖАББОРОВ.

